

ሞት እማት ወክሮት ትነቅሰ



ሞት እማት እት ወክሮ ፅምሰነ ወወሊድ እብ 76%፡ ሞት ምን 5 ሰነት ወትሐት ለዓማርም አጀኒት ህይ፡ እብ 75% ከም ነቅሰት፡ ዲብ ውዛረት ዓፍየት ሙዲረት ፈርዕ ዓፍየት ዓይላት ወማዕዩ ዶክተረት ብርሃና ሀይሌ ሐበረት።

እግል ኤሪነ ዲብ ሀበተ ሐብሬ፡ ዶክተረት ብርሃና፡ ዲብ ሰልፍ 90ታት ሞት እማት ዲብ ወክሮ ፅምሰነ ወወሊድ 1,900 ምን 100 አልፍ፡ ሞት ምን 5 ሰነት ወተሐት

ዐውቲ፡ ሐቲ ምን ዲብ ፈዓልየት አህዳፍ ሚሊዮንም ዐቦት ለሰጀለየ ድወል ሐዳት እግል ትግባእ ከም አተቅደረተ እንዴ ሐበረት ዶክተረት ብርሃና፡ መትከምካም ደገጊት፡ ፈዛዐት ሙጅተማዕ፡ ወመትነፋዕ መአሰሳት ዓፍየት፡ ገሌ ምን እግደ ዐዋምል ክም ቶም ሸርሐት።

ሸዐብ ምስል እዳራት እት ልትዓወን፡ ዲብ አድመኖት ዓፍየት ዓይላት ለአርእዩ ለሀለ መትከም ማዕዩ፡ ዲብ ዐውቲል ልትኤተን በራምጅ ዶር ዐቢ ክም ቡ እንዴ ሐበረት ዶክተረት ብርሃና፡ እሊ ምስል ሕኩመት ዲብ አድመኖት ዓፍየት መዋዋኒን ትተብዑ ለህሌት ዐገል እንዴ ትወሰኩ፡ ለተአደሚዕ ፍገራት ትትረከብ ምኑ ክም ህሌት እንዴ ሐበረት፡ አሰክ 2030 ኢቲን ለሀለ አህዳፍ 'ረህየት ለተአመጽኦ ዐቦት' ለዐውቲ ክም ትደገም ዳምነት ክምተ ወድሐት።

ዲብ ውዛረት ዓፍየት ሙዲረት ፈርዕ ዓፍየት ዓይላት ወማዕዩ ዶክተረት ብርሃና ሀይሌ እት ደንገብ፡ ዓፍየት መዋዋኒን እብ ዓመት እማት ወክሮት ህይ እብ ፍንቲት እግል አደምኖት እተ ገብእ ጅህድ፡ መሻረከት ማዕዩት ወመዓወነት መአሰሳት ሕኩመት ክም ተአትሐዜ አፍሀመት።

ምስኩናም፡ ከደማት ሕክምነ ዕንታት ገብእ እሎም



መሕበር ወጠን ምስኩናም መሐርበት ሐርብ ኤረትርዮ፡ እት ዮም 25 ወ26 ፌብራዩር እግል ዝያድ 300 አዕዳኡ እብ ለሀ ከደማት ሕክምነ ዕንታት ሀበ።

ለእት መክተብ መርከዚ ናይለ መሕበር እተ ትትረከብ ዕያደት ዕንታት ወእስብዳልየት መዐስከር ደንደን ለተሀየብ ከደማት፡ ፈሐስ ዕንታት ወወዘየት ነዓራት ለሸምል ቲ።

ሀደፍ ናይ እሊ ከደማት ሕክምነ፡ መሻክል ናይለ ምስኩናም እንዴ ተአመረ ሕሉል እግል ወጀዶት ክምስለሁመ እብ ዐወል ረኽሰ ነዓራት ወዘየት ክምቲ ለሸርሐ መመቅረሓይ ናይለ በርናምጅ አሰይድ ረዘኔ

መብረህቲ፡ 70 ምን ትረአው ነዓራት ክም ተሀየቡም ሸርሐ።

እሊ እግል 2 አምዕል ለአተላለ በርናምጅ፡ እብ መዓወነት ሐካይም ብርሃን ዐይኒ ወእብ ምራድ ኖሰ ምን ብርማንዩ ለመጸት ዶ/ረት ሰናይት ፍሰሃይ ትሰርገል።

መትነፈዐት እግል ኤሪነ እተ ሀበወ ሐብሬ፡ እለ እብ መሕበር ለትነሰአት መባደረት እግሎም ሰዓይት ዐባይ ክምተ እት ሸረሐ አተላላይ እግል ተሀሌ እለ ትፋነው።

እሊ እብ አቅሊም ምግብ ለአንበተ በርናምጅ፡ እት ወቅት ቅሩብ እተ ብዕድ አቃሊም እግል ልትሰርገል በርናምጅ ክምስል ህለ ለተሀየቦት ሐብሬ ተአፍህም።

ዝያረት መፈወድ ዓዳት ወርያደት ኤረትርዮ እት ጃፓን

መፈወድ ዓዳት ወርያደት ሰፊር ዘመዴ ተኽሌ፡ እብ አሳሰለ ገአት እሊ ዐዘመት ምን ዮም 20 አሰክ 26 ፌብራዩር እት ደባን ዝያረት ረስምየት ወደ።

ሰፊር ዘመዴ እት ዝያረቲ፡ ምስል ወዚር ኤሎምፒክ ወፓራኤሎምፒክ፡ ወዚር ኻርጅየት፡ ሓክም አቅሊም ኪናጋዋ፡ ናይብ ሙዲር ሀይላት ተንፊዝየት ኤሎምፒክ ቶክዮ 2020፡ ናይብ ርኢሰ



ኤሎምፒክ ደባን ክምስልሁመ ምስል ብዕዳም መስኡሊን ወመመቅረሐት ርያደት ደባን ህድግ ወደ።

ወዚር ኻርጅየት ደባን ሚስተር ፋምዮ ኩሺዶ፡ ዝያረት መፍወድ ዘመዴ ተኽሌ እት ደባን እት ወቅት ሙሁም ትገብእ ክም ህሌት፡ ደባን ምስል ኤረትርዮ ለባተ ዐላቀት ህይ እት ተዐቢ ወትጠወር ትመጽእ ክምስል ህሌት ሸርሐ።

ሰፊር ዘመዴ እብ ተረቲ፡ እለ ዝያረት እለ እብ ፍንቲይ ክም ልርእየ እት ሸርሐ፡ እሊ እት ርያደት ወዓዳት እንቡት ለህለ መትዓዋን እግል ልጠወር ሰእየቲ ሸርሐ።

ምስል ናይብ ሙዲር ልጅነት ተንፊዝየት ኤሎምፒክ ቶክዮ 2020 ሚስተር ዩሱዎ ሞሪ እተ ገአ ህድግ፡ እብ ተውሳክ፡ እግል ኤረትርዮ እት ብድረ ኤሎምፒክ ለሰድዩ መትነፈዓይት ናይለ እት አቅሊም ሚሳዶ ለትበን ተእሂል ዐጀላት እግል ትግባእ ለለአተቅድረ በክት ልትሀየብ እት ህለ፡ እት ወቅት ቅሩብ እብ ሕበር እግል ሸቅየት ለለአተቅድር እትፋቅት እግል ፈረሞት እት መፋህመት ትበጸሐት።

ዐላቀት ደባን ወኤረትርዮ እትሊ ወክድ እሊ እት ርያደት ፍሬ ለአርኤ ክምስለ ህለ ለሐበረው ለሰብ-ሰልጠት፡ እት መጃል ዓዳትመ እት ክምስለ ትመስል ደረጃት እግል ትትበጸሕ እግል ልግበእ ለቀድር ጅህድ እቲ ሀድገው።

ከበር እስትሸሃድ

ገዲም ሙናድል ዐብዱ ሰሌማን ዐብዱ ምህራ፡ እብ ሕማም ዲብ ዮም 27 ፌብራዩር ዲብ 63 ሰነት ምን ዕምሩ አስተሸህደ።

እት ሰነት 1975 ዲብ ቅዋት ሸዐብ ተሕሪር ኤረትርዮ ለአልተሐቀ ሸሃድ ዐብዱ፡ ቀደም ሕርየት ዲብ እዳረት ሸዐብ መንጠቀት ምፍጋር ጽሓይ ዲብለ ትፈናተ ደረጃት መስኡልየት እብ መትሰባል ለናደለ ምሔርባይ ቲ።

ሐቆ ሕርየት ሰልፍ ከም መስኡል መክተብ ማልየት ኮር 161፡ ሐቆሁ ህይ ከም መስኡል ማልየት ዐመልየት መንጠቀት ክልኤ እንዴ ገብእ ሸዐብ ወወጠኑ እብ መትሰባል ለከድመ ገዲም ሙናድል ዐብዱ፡ እብ ዐለ ዲብ ሕማም ዲብ እስብዳልየት አርታ ልትሳሬ ሐቆ ጸንሐ ማሌ አትሂን 27 ፌብራርይ አስተሸህደ።

ዓደት ቀብሩ ህይ ማሌ አተሉት ዮም 28-02-2017 ሳዕት 4፡00 አልዐስር ዲብ መቅበረት ሹሀደ አስመረ ገብአት።

ውዛረት ድፋዕ እብ እስትሸሃድ ገዲም ሙናድል ዐብዱ ሰሌማን ዐብዱ ሐዘነ ዲብ ትሸርሐ፡ እግል ዓይሉቲ፡ ፈተቹ ወመልህያሙ ኤማን ወሰብር ለሀበኩም ትብል።



ሰካን አሰማጥ ወሀበር፡ ሰሜት ክሸቦ ከሩ



ወኪሉት የረሸቡ ሻቦት ራንያ

ሰር ምጅተመሪ ዐለም አንሳት ተን። ምናተ አንሳት አክል ወድ ተብዐት ለአለባለብን ምጅተም፡ እዲን ሕፃም አታን። ከአብሊ ዲብ አንሳት ብዙሕ ዐዋዲ ጨቅጥ ገብኦ ጸንሕ ተ። ክሸቦ ሆይ ምሮት ምኑ ተ።

ለመድ ክሸቦ ለብሕተን ድወል ዐለም፡ ድወል አሰዩ፡ አፍሪቀ ወምጣይ አሚሪክ እት ገብኦ፡ እት ረከሰ አንሳይት ደረር ብዙሕ ለአጀርያ ነበረዋ። እት አፍሪቃም ኤራትሪያ እንዴ ወሰኑ 28 ደውለት ህለዩ አዋልድ ለልክሸቡ።

ምድረት ክሸቦ ሆይ ሲሄድ ተ። ገሌ ምን ምን እንደከር፡ መጸጸት ወክዐይ ደም፡ መትታጣር ዲብ ወክድ ወሊድ፡ ከፊሪ ሸን ወደውረት፡ መትታጣር መትረብ ሸን ከደን ወማይ (ፊላቴሊ) ወብዕድ ነሳይብ እት አንሳይት ጀሬ።

እሊ ነሳይብ እሊ ለውላድ ተብዕን አክል-ሕድ ደልወ ምንመ ደዐለው፡ አምር ላተ ለአሙሩ ዐለው። ምናተ እብ ሰብ ጀህል ወይአምር፡ ክሸቦ ምን መደትለ ጃእር ሕክም መሰር ለዐለ ፈርዖን እት ድወል ብዕድ ክም አሰላሰበ ለደሉ ሐ-ፃም ዐለው።



ፍርቀት ዓዳት ምዴርየት አሰማጥ

እፈትርየ፡ ጸሐፊ

ክል አርቡዕ ለትጠነዕዕ ጀሪደት

መዳልያይ፡

መሐመድ እድረስ መሐመድ

ናይብ መዳልያይ፡

አድም ሳልሕ (አቡሐራሽ)

ለይ-አውት፡

ዘህራ ዐሊ

ፋጥና አደም

ተለፎን፡ 121797

ፋክስ፡ 127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284

እሊ ፍሩራት ዐለዩ። እማት አዋልደን እግል ለአትብሸበ ዶል ለሐዘዩ እምነብ ተን ለልዐዘመ። ወሀቡ እብ ሐቱ መላጼ አው ላመት ብዘሓት ሰበት ትክሸቡ አሸክ እብ ቴታህሰ ለመሸከዩ አንሳት ሕፃት አታን።

ሕክመት ኤራትሪያ እሊ ዲራይ ዐዋዲ እግል ተአሰርት ምን መደት ንዳል እንዴ አሰተብዴት አትፋዝዶት ትወዴ ዲቡ ነበረት። ምናተ ለሸዐብ ክም እሊ ናይ አዜ እት ሕርየት ዐዱ ዲብ ድቡል ወመሳክብ ሳብት ጅምሪ ወም፡ ዱን ነብር ሰበት ኢነብራ እት ክል አካን ቀበት ዐድ ወክርጅ ሰርቱክ ምን ጸንሐ ለተዕበላት ኩሉ ሸዐብ ገጽሕድ ወሕበር እግል ልፍህሙ ኢቀድራ።

እት ሰነት 2007 ሕክመት ኤራትሪያ እብ ለአፍገረቱ አዋጅ አሰራቶት ክሸቡ ሚርሐት ደዮናት፡ ዐባይ ዐድ ወክሰሰን መሕበር አንሳት ወአንፋሩ ሕበር ምን



ሙዲረት ምዴርየት ሀበር አሰይደ ዓሽ ዐሊ-ኖር

ላኪን ምን ቆምየት ዲብ ቆምየት ጀኦረትለ ዓደት ክሸቦ ትትፈናቱ። ክሸቦ ዘራዛር ክተፍ ምን አፍርሕም አንሳይት ሻፋጥ፡ መቅእ ወአትጫባብ ሰበት ብእቱ ሲሄ ለልኦመጽጽ ውዳይ ተ። እምነብባት ሆይ እትሊ ሸቅል

ሓረበው፡ ምን አትፋዝዐው እቱ ወምን አበው፡ እትሊ ወክድ ሽ ወላተ እት ሐን እምነብብ እግል ላመት ወመላጼ ክሸቦ ለትጽብዋ እም ኢህሌት ወምንመ ለህልዩ ሲሄ ሐ-ፃት ተን።

አንፋር ውሳረት እዕላም ምን አቅላም ጀሪደት፡ ራድዮ ወተለፍዝዮን ምስል አንፋር ውሳረት ዓፍየት ምን ዮም 18-24 ፊብራይር እት አቅሊም ዐንሰበ አሰመ። ቀረድለ ጀውለትነ ሆይ፡ “ምዴርየት አሰማጥ ወሀበር፡ ምን ክሸቦ ነግዶ ህለዩ” ለልብል ከበር ሰበት መጽሐፍ እት መናሰበት እዕላን አብደዮት ክሸቦ ምስል ሸዐብ እግል ንሕደር ወለመናሰበት እግል ንወሰቅ ቱ ለዐላ።

ማሸአለህ! እሰልፍ ዮም 18 ፊብራይር 2017 ምዴርየት አሰማጥ “ክሸቦ ምን ምዴርየትነ ትመሐ” እንዴ ትቤ ተዐልን ዲብ ህለት፡ ሸዐብ ምስል እዳረቱ አጅሀዘት ሕክመቱ ወለምን በዲር ዲብ አሰራቶት ክሸቦ ትክድም ለጸንሐት ልጅነት፡ ሐቱ “ምዴርየት አሰማጥ ምን ክሸቦ ነገት” ለትብል ያፍተት እንዴ አዳሌት፡ ክሸቦ እት ምዴርየት ክም ኢለአቀብል ወክተማሁ ክም ተ እብ ለአፍህም አሰራር ሰላም ወሸግራት እት ለአሰምዶ፡ አንሳት ሆይ ንኢሸን ወዐባዩን ለምድረት ክሸቦ እንዴ ፈሀመዩ፡ እብ በዳሁ አግጸተን ፋሬሕ ዶል ረከናሁ፡ “ሐገገት እሊ ሸዐብ እሊ ክሸቦ ምን ቅርዱ ነቅለዩ” ለአተብሸቡ።

ዮም 18 ምን ገጽ አሰቡሕ አዳም እብ አሰራር ሰላም አሰክለ ምን መዲነት እንክር ግብለት ምን ሸንክት እንሰር ዲብ ተኣቱ ለትትከብተክ ያፍተት እዕላን አሰራቶት ክሸቦ ክም ጌላ ወክል ወዘር ዓፍየት ዶክተር ከሰቱብርሃን እግል ግልብቡት ለዐለት ያፍተት ክም ከሰቱ፡ አንሰ ወሸዐብ እብ ዕላት ወሆርያታት ምድር በሰሰው፡ እሊ ሆይ ለዴራይት ዓደት ክሸቦ ኩሉ አበሀ



ፍርቀት ዓዳት ምዴርየት ሀበር

ክም ዐለ ወዳር ጨቅጥ እት እንተ ክሪት እቶም ክም ጸንሐት ለአርኤይ፡ ሐቅህ ኩሉም ዕዙማም ወሸዐብ ደገጊት አሰማጥ እት ቃዐት እጅትም፡ መዲነት አሰነደ እንዴ ትጀመዐው፡ ክሸቦ ለልትዳገን ፈርዶት ፈን እብ ፍርቀት ዓዳት መድረሰት ቦርዲን አሰማጥ ለትፈናተ ሐልዮት፡ ተማሲል፡ አሸፃር ወክሊማት ናይ ለትፈናተው ሰብ ሰልጠት ሕክመት በሀለት እብ ሙዲር ምዴርየት አሰማጥ አሰይድ አብብር መ/ጅማሪ፡ ሙዲር ምን ከደማት ምን አቅሊም ዐንሰበ አሰይድ ዐብዱላሂ ቲታ፡ ሸክርቲረት ፈሬዕ ጀብህት ሸዐብየት አቅሊም ዐንሰበ አሰይደ አመቱ ነጋሲ፡ መሰሉለት መሕበር ወጠን አዋልድ አንሳት አቅሊም ዐንሰበ አሰይደ አምና ሐሸን፡ ወክል ወዘረት ዓፍየት ዶክተር ከሰቱብርሃን ወብዕዳም መሰሉለን አፍረዐት ከሊማት ምሐ ክሸቦ ክም ትሰመዐ፡ ፈርሐትለ ሰነን ንቀር በጽሐት። አሸክ ሰር ምዕል ሆይ ለመናሰበት እብ ሐልዮት፡ ተማሲል ወአሸፃር ፍርቀት ዓዳት ምዴርየት አሰማጥ (ቦርዲን) ጋምለት ወዐለት።



አሰይድ አብብር መ/ጅማሪ (ሙዲር ምዴርየት አሰማጥ)

ዮም 20 ፊብራይር ሆይ እግል ነፍሱ ለቀረድ ምዴርየት ሀበር አሸክ አተጅሆ። “ክሸቦ ደኣሙ ልግበኦ፡ ክሸቦ አብጠርናሁ” ለልብል ወብዕድ ሸግራት፡ ክምስልሁመ “ምዴርየት ሀበር፡ ክሸቦ አሰረተት” ለትብል ያፍተት ክም ረከኑ ወእለ መንጠቀት እሊ ምን ሲነን ቅዱም ተክሸብ ለጸንሐት ሰበት ነበረት፡ ለፈዛዐት ወላተዕበላት ተእሲር ዛይድ ክም ወደ ወድሐ እግል። ሰበት እሊ ምዴርየት ሀበርም ክምሰለ ናይ አሰማጥ “ምን ክሸቦ ሕር ገብአን” እንዴ ዐለነት፡ አዳም ምን ምስት 19 ፊብራይር እንዴ አንበተ እብ ፍርቀት ዓዳት እማት ወፍርቀት ዓዳት ‘ናዲ ሳረ’ ምዴርየት ሀበር ለትፈናተ ክሸቦ ለሰቅቅ ወለልትዳገን ሐልዮት፡ ተማሲል ወአሸፃር ልትቀደም እት ሀላ፡ እት ዮም 20 ፊብራይር 2017 ምዴርየት ሀበርም እብ ለትፈናተ ከሊማት እት ለዐል ለሀደግናህም መሰሉለን ወጀሃት፡ ከሊማት ክም አተንሰ፡ “ክሸቦ እት ድህር ሕፍረት ቀበርናሁ” እት ልብላ፡ እማት ሆይ፡ ለልኦሸዐል ዘራዛር ክሸቦ እት ልትዘከራ፡

“ግረ እሊ አዋልድን ኢነክሸብ” እት ልትባህለ ዶል ትሰመዐኳ ደሚርክ በክትለ አዜ ለአብሀዘ ምን 15 ሰነት ወተሐት ለዓማሩ አዋልድ ወግረ እሊ ለልትዋለድ እግሉ ለአሞመክን። ሸዐብ ክልኢተን ለምዴርየት ሆይ እብሊ እሕትፋላቱ እግል ክሸቦ አክረቱ ክም ወደዩ ገለዶም እቱ ክም ለሐጠ ምስል እዳራቶም ወመትፋዝዐቶም አከደው እግል።

አክረቱ ካቲማለ እሕትፋል ድግክ ክሸቦ እት ዮም 23 ፊብራይር ዲብ ቃዐት ሆቴል ሳሪን (ከረን) ክልኤ ወረቀት በሐሰ፡ ዕፌ

ዓዳት ወረኣይ ምሽተርክት እንዴ ትቀደመ፡ ንቃሽ ክም ገብኦ እቱ ምስትለ ምዕል ምን ሳዐት 2:30-5:00 እት ጃት መዲነት ከረን፡ ውቁላም መሰሉለን ሕክመት፡ ሚርሐት ደዮናት፡ ወክሊት የረሸፍ እት ኤራትሪያ ወሸዐብ እት ሐድረወ መናሰበት፡ እብ ሸሬሕ ወክል ወዘረት ዓፍየት ላቱ ዶክተር ዓንደብርሃን ናይ ካቲመ ከሊማት እብ ትደበኡ። ፍረቅ ዓዳት ደረሰ ቦርዲን አሰማጥ ወሳረ-ክለብ ሀበር ለትፈናተ ክሸቦ ለክር ጸባዩ ፈን እንዴ ቀደመዩ፡ እት አክር ናይ ማል ወአላት ጀዋእዝ ተህየበው። ምዴርየት ሀበር-አሰማጥ ምን ክሸቦ ሕር ገብአዩ፡ ለምዴርየት ብዕድመ እግል እግል ልትላ ወዴራይ ክሸቦ አንሳት እግል ለአብዴ ልትላከዩ ወመሰል ስኔት እንዴ ገብአዩ ለሰልፋዮት ክሸቦ ለአብደዩ ምዴርየት እንዴ ገብአዩ፡ ዲብ ስኔት እማት ወሐዋት መጅተመሪ ኤራትሪያ ዋልዩ ሰበት ህለዩ፡ “ኬር-ዋልዩ” ሰሙያት ህለዩ። አይወ ምዴርየት አሰማጥ-ሀበር ኬር-ዋልዩ እግል ሰን ኬርዋሉት!





1. ተበረዓት ወመትከባት ተበረዓት

ተበረዓት (ውዑል እግል ውድየት ለገብእ ዕድም) ክምሰልሁ መመተከባት ተበረዓት (መተከባት ዕድም)፡ ዲብ እትፋቅየት እግል ብጽሐት ለሰዓ አሳሲያይ ፈሀም ቃኑን ውዑል ተ። ፍንጌ መተፍቀት እብ ሰበት ናይለ ለሐዘዎ ሀይፍ ናይ ቤዕ ወሽረ ህድግ እንዴ ወደው፡ ለመትበረዓይ ወመትከብታይ ተበረዓት እበ ሀድገው እቱ ሀይፍ ዲብ ዎሮ እትፋቅ ክምሰል በጽሐው ውዑል እሱስ ክምሰል ህለ ለአሸር። እብለ ገበይ እለ ህዩ ዎሮ ውፋቅ አው ውዑል ትከለሰ ለልትበህል ተበረዓት እብ መትከባት አው እትፋቅ እግል ልርኤ ታምም ላቱ ፍዕል መተፍቀት ተ።

እግል መሰል፡- ዎሮ ዘበን ዲብ ድካን እንዴ አተ ምነ እተ ድካን ለህለ ማል ለሐዘዩ እንዴ ሐረ ዐውል ናይለ ማል እንዴ ትሰክለ ዲብ ዎሮ ለልደፊዖ ቅያሰ ሰላዲ ክምሰል ትዋፈቀው፡ ለዘበን እግል ልድፈዕ ዲብ ቀደም መሓሰብ እንዴ ጌሰው እትፋቅም እንዴ አትመመው ፍንጌህም ሐቅ ወዋጅብ ካልቃም ህለው።

ተበረዓት በህለት ነፈር ዲብ ውፋቅ እግል ልእቲ ዲብ ነፈር ብዕድ ለቀድሙ ይማም እት ገብእ፡ እለ ይማም እለ እበ ጀህት ለብዕደት ኩቡቴ ዶል ረክብ ህዩ፡ እቡ እንዴ ትቀየደ እግል ሊጊስ ክምቱ ለሸፊሕ ዐገል ተ። ቃኑን ወፋቅ ተበረዓት እግል ልሽጠብ ክም ኢቀድር ብዩን ህለ። ምናተ ለትበረዐ ነፈር እግል ልሽጠቡ ዶል ለሐዘኔ እግል ስሐብ አው ሽጢብ ተበረዓት፡ ቀደምለ ተበረዓት አው ምስለ ተበረዓት ዲብ ሐቲ ኢነት ዲብለ ተበረዓት ቀርብ እቱ ለህለ ነፈር ዶል ለአበጽሑ፡ ተበረዓት እግል ልትሰሐብ አው እግል ልትሸጠብ ቀድር።

እግል መሰል፡- ዎሮ ሐረሰታይ ዲብ ተሰነይ ኦብጌዕ ብዘሕት ዐለት እሉ ኒበል። እለ ሐረሰታይ ዲን ሰበት ዐለ ዲቡ፡ ዕዳዩ እግል ልፍዴ ለለኦተቅድሩ ማል እግል ልርከብ አባግዑ ሰ'ረ እግል ለአዝብዩ ቀረረ። እብለ ህዩ እግል ዎሮ ዲብ ዝቤ ወመትዛባይ አባጌዕ ለሸቂ ዲብ አሰመረ ለህለ ታጅር ሰ'ረ እግል ልዛብዩ ዐውል እንዴ ዘክረ ተበረዓቱ እብ ገበይ ዎሮ ነፈር ልኡኹ እብ ጀዋብ ነድኦ ዲቡ። እለ ሐረሰታይ እግል እለ ታጅር ለወደዩ ተበረዓት እግል ልሽጠቡ ኢቀድር። እግል ልሽጠቡ ገእ ምንገብእ ላኪን መሸጠቢ ተበረዓት ልኡኩ ቀደምለ ዲብለ ታጅር ለነድኦዩ ልእከት ተበረዓት፡ አው ዐዘመት ውዑል ብጽሐቱ፡ አበጽሐዩ ምንገብእ አው ምስለ ተበረዓት ዶል ትበጽሕ ሌጠ ተበረዓት ልሽጠብ።

ተበረዓት እብ ቁል አው ክቱብ አው እብ ዎሮ ልሙድ አሻይር ዲብለ ልትዐደም እግል ልቅረብ ቀድር። ዲብ ሽዑብ እብ ጀሪደት አው እብ ራድዮ እንዴ ትነሸረ፡ እብ ቁል ገሌ ሓጀት እግል ወደ ፊኩ አው ዐውል ጸግሁ ህለ እሉ ለቤል፡ እብ ቃኑን ህቱ ክም

ክሰሶት ክትፋቅ (ወዑክ)

መዐድማይ እግለ ዐዘመት እንዴ ትከቡተ ገሌ ሓጀት ለወደ ህዩ፡ ክም መትከብታይ ልትሐሰብ።

እግል መሰል፡- ሐቲ ደሀበ ለበደ አንሳይት፡ ዲብ ጀሪደት እግለ ባዲ ደሀበ ለረክብ ነፈር ዕዳዩ 500 ነቅፈ እግል ትድፈዖ ክምተ ተአውጅ። ዎሮ እናስ እግለ በደ ደሀቤ፡ እንዴ ረክብ ዲብ እዴህ ሰልሙ። እት ፍንጌህ ወእት ፍንጌለ ደሀበ ለረክብ እናስ፡ ውዑል አው ውፋቅ ጋብእቱ። እብለ ህዩ፡ እግል ትድፈዖ ቁል ለኡቴት እሉ 500 ነቅፈ እግል ትድፍዑ ዋጅባ ተ።

መትከባት ተበረዓት ለልትበህል ህዩ፡ ለተዐደመ ነፈር እብ አሳሲለ እተ ዐዘመት ለህለ ከለማት፡ እግል ልትቀየድ እግለ ለዐድም ለሸረሐ አው ለለሀይቡ፡ በለስ አሆታይ ተ። ተበረዓት አው ዕድም ውፋቅ ክምሰል ገብእ እብ መትከብታይ ተበረዓት ለልትዮብ ቁል፡ አው ክቱብ መትከባት ተበረዓት አው መትከባት ለለኦመሰሉ ጠባዩዕ ብዕድ፡ ዲብለ ተበረዓት ለቀርብ ነፈር፡ እብለ ትበጸሐ ውዑል ተበረዓት፡ ክምሰል አክተመ ልትሐሰብ። እግለ ቀርብ ዲብክ ተበረዓት አው ዕድም ውዑል አዚም አው ኢሐሰሳይ ላኪን ክም ኩቡቴ ኢልትነሰእ። ተበረዓት እንዴ ቀርብ ዲብ በለስ ለኢሀበት ጀህት፡ እብ ሰቡብ ናይለ መትወዓዕለት ጀሃት እት ፍንጌህም ለአሰሰው ዝም ሸቅል ወለመድ፡ ለተበረዓት ቀርብ ዲብ ነፈር፡ እግል መትበረዓት እንዴ ኢለትአምር ገሌ ሸይ ምን ወደ ሌጤ ረዳሁ እግል ለአሸር ቀድር ገእ ምንገብእ፡ ለፍዕል እበ ገብእት ተክቢተት ናይ ተበረዓት ክምቱ እግል ንፍህም ወጅብ። ዎሮ ተበረዓት እብ ቀበትለ መትበረዓት ለለሐድዱ ወቅት አው ህዩ መትበረዓት ወቅት ናይ ኩቡቴ ኢወደ ምንገብእ፡ እግለ ቴለል ሸፋግ ናይለ መትበረዓይ ለትነፈዕ እቡ አግቡይ እትሳላት ዲብ ሕሳብ እንዴ አተ፡ ዲብ ቀበት ራቴዕ ወቅት እግል ልትከበት ቡ። መትከባት ናይ ዎሮ እብ ቁል ለገብእ ተበረዓት ህዩ፡ እተ ዶሉ እግል ልግበእ ቡ። እብ ጀዋብ እተ ገብእ ተበረዓት ህዩ፡ ለመትከብታይ ተበረዓት፡ ዲብ ወቅቱ እግለ ኩቡቴ ተበረዓት እብ ሸክል ጀዋብ ክምሰል ለአከዩ፡ ዲብለ መትበረዓይ እተ በጽሐ ዲቡ ወቅት፡ ውዑል እሱስ ህለ።

ለኩቡቴ ምነ መትበረዓይ ለሐደደዩ ውቀት ምን ደንግር ሚ ሰብብ? ለደንገረ ኩቡቴ ለጸብጠት ልእከት አው ክቱብ ብዕድ፡ ለገበይ ለእበ ትለክአክ ልምድት እበ ገበኣት ገበይ እግለ መትበረዓይ፡ እት ወቅተ ወበጽሐት ዐለት እተ ተአተብል ሓላት፡ ክም ለአክ ዶል ለአርኤ፡ ለመትበረዓይ ለኢለትሐዜ መትኦካር እንዴ ኢወዴ፡ ለተበረዓት ወቅቱ ክም ሐልፈ ክም ልትዐለብ እግል መትከብታይ ተበረዓት ደኦትአመሪዩ ምንገብእ፡ ለድንግርት ኩቡቴ፡ ክም ኩቡቴ ፍገሪት ለህሌ እሉ፡ እብለ ህዩ ውዑል ክምሰል ተአሰሰ ልትነሰእ።

2. በቃዕት ውፋቃት፡-

ዎሮ ውፋቅ ባቂዕ እግል ልግበእ፡ ምን ልውሕድ እግል ልትመሞ ለወጅቦም ዐዋምል አሳሲያም ህለው። እሎም ዐዋምል እሎም ውዑል እግል ልትአሰስ ሰኒ አህምየት ቦም። ዲብ ቃኑን ውዑል ዎሮ ባቂዕ ወለቀይድ ውፋቅ ውዑል ክም ህለ እግል አከዶት፡ እለ ለተሌ ምህም ንቀጥ ላዝም እግል ለህሌ ቡ።

- በቃዕት መትወዓዕለት
- ሰሚሕ ወንዶት ወፍክር መትወዓዕለት፡
- እብ ቃኑን ለተአዘዘ አው መትወዓዕለት ጀሃት ለትዋፈቀው ዲቡ ዐገል ለገብእ።
- ሀይፍ ወዑል እብ ተአስትህል ለትሸረሐ ወቃኑይ እግል ልግበእ።

እለ ለትዘከረ ምህም ንቃጥ፡ ዲብ አሰሶት ውዑል ላዝም እግል ለህሌ ቡ። ምን እለ ንቀጥ እለ ዎሮ አው ምኑ ወለዐል ዶል ነቅስ ህዩ ለትበጸሐ ውዑል እግል ልፍረስ ቀድር።

2.1 በቃዕት ቃኑይት መትወዓዕለት

ቃኑይት ፍዕል እግል አትመሞት፡ ክል ነፈር በቃዕት እግል ተህሌ እሉ ላዝም ተ። እብ ህግዩ ብዕደት ለገብእ ነፈር፡ እብ ቃኑን በቃዕት አለቡ አሰክ ኢትበህሉ፡ አፍዓል ቃኑይት(አሰክ ውዑልመ) እግል ሊዴ ቀድር። ሕዱድ ናይ መትወዓዕል በቃዕት ምን ክልኦት አሳስ ለትበገሳ ተ። ለአወላይ መዐነት ወሰብብ ናይ ውዑል እግል ትፍህም ለለኦተቅድር በቃዕት ናይ ሙኻ ኢሀለዮት ገብእ እት ህለ፡ ለካልኣይ ህዩ፡ ዎሮ ነፈር በቃዕት ሙኻ ዲብ ብእቱ እብለትፈናተ አሰባብ በቃዕቱ እብ ቃኑ ዶል ልትሐደድ፡ አው ዶል ልትዝዕቱ። በቃዕት ቃኑንዶት ለአለቦም አንፋር፡ ተሐት ዕምር፡ ሕማም ዐቅል ለቦም፡ መዕነት ወደረር ናይለ እግል ሊደው ለሐሰዩ ለህለው ውዑል እግል ለአምሮ ወእግል ልፍህም ለነፈዶም ወለደርሮም ውፋቅ እግል ልምዘኖ በቃዕት ዐቅል ለትነቅስ ምኖም እበ እሉ ወዱ ቃኑይት አፍዓል መሰለሐቶም እግል ኢትትኦዜ፡ ዐረድ ቅድረቶም ዋጅባት እግል ኢልርፈዶ፡ እግል መዳፈዕት ጀለ መሰለሐቶም እንዴ ትበህሉ፡ ውዑል እግል ኢሊደው ለልትከረዖ ቶም። ለረሽዶም ወደርሮም ለለአምሮ፡ ወለልፍህም ውዑል እግል ሊደው ታመት በቃዕት ዐቅል ለቦም፡ ምናተ እብ ሰቡብ ለወደወ ጀሪመት፡ እብ ቀራር መሕከመት፡ ገሌ መደኒያይ ሕቁቆም ለትዝዐ ምኖም፡ ዐለኖት ጠፈሽ ዲብ መአሰሳት ዶል ሳድፍ አውመ እብ ብዕድ አሰባብ በቃዕቶም ለነቅሰት ምኖም አንፋር ህለው። ምስል እሎም በቃዕት ቃኑን ለነቅሰት ምኖም አንፋር ለገብእ ውዑል ህዩ፡ ክምሰል ዔብ ለብእቱ ሰበት ልትነሰእ፡ ዲብለ ናይ ሕማም ዐቅል ወተሐት ዕምር እብ ሕርያን ናይለ በቃዕት ለአለቡ ነፈር፡ አው

ፊፍዓዩ፡ ለውዑል እግል ልፍረስ እሉ እንዴ ጠልቡ እግል ለአፍርሱ ቀድር። ዲብለ እብ ቃኑን በቃዕቶም ለትከረዐት አንፋር ህዩ፡ እብ ሕርያን ናይለ ሐቲ ጀህት ውዑል እግል ልፍረስ ሸክ እግል ልቅረብ ቀድር። እግል መሰል፡- ዎሮ ወድ 15 ሰነት ንዋይ እንዴ ነሰኦ፡ ምስል ዋልዳዩ ዐዳገ አተ። ዋልዳዩ ምኑ ክም ትነወኩ፡ ዎሮ ብዕራይ እግል ልትዛቤ ለመጽኦ እናስ፡ ምስለ ወድ 15 ሰነት ብዕ ወሽረ እንዴ ወደ እግል ብዕራይ እብ 2000 ነቅፈ ትወዓዐለው። ወማል እብ ተማሙ ትደፈዕ። እለ ወድ 15 ሰነት እግል ልትወዓዐል በቃዕት ቃኑንዶት ሰበት አለቡ፡ ዋልዳዩ ለውዑል እግል ልፍረስ እሉ እግል ለሐብር ቀድር።

2.2 ፈሌሕ መትወዓዕለት፡ ውዑል ምን ቀልብ አው ምን ንዶት መትወዓዕለት ለልትበገስ ቃኑይት አፍዓል ተ። እለ በህለት ዎሮት መትወዓዕላይ፡ ውዑል ወዴ እቡ ለህለ ሀይፍ እንዴ አሸረ፡ ክምሰልሁመ ውዑል እበ ከልቆ ዋጅባት ክም ልትቀየድ ንዩቱ ዶል ሸፊሕ እግል መትኦሳሰ ውዑል አግደ ምነ ገብእ ንቀጥ ታምም ህለ እግል ልትበህል ቀድር። ዎሮ ለቀይድ ውዑል ተመ እግል ልትበህል ላዝም ለልትወዓዐሎ ጀሃት፡ ውዑል እግል ሊደው፡ ፍክር ወምራድ እግል ለህሌ እሎም፡ ፍክርም ህዩ እምበል ተሐፍዝ፡ እግል ልትዋፈቅ ቦም። እብ ሕር ንዶት መትወዓዕለት ለገብእ ውዑል ልትበህል እት ህለ። እግለ ውዑል ለለኦፈርሶ ንቁሳት፡ ክም ጌጉ ቀሽ አትፋረህ እግል ለህሌ እቱ አለቡ በህለት ተ። ውዑል ህዩ እብሎም ተሉ አሳሳይም ንቁሳት እግል ልፍረስ ቀድር።

ከጠእ አሳሲ ጌገ በህለት አማን ለኢኮን ሸይ አው ዲብ ሐሰት እንዴ ተአሰሰ ለገብእ ሸይ አማን እንዴ አተምሰልከ አትአመኖት በህለት ተ። ዎሮ መትወዓዕላይ ነዩቱ እብ ጌጋቱ ሀበ ለልትበህል እለ ለከጠ ነፈር እግለ አማን አምረ ምንገብእ፡ ዲብ እለ ውዑል እለ ወዩአተ እንዴ ትበህለ ዶል ልትአመን ሌጣቱ። ክምሰል መደረት ናይ እለ ህዩ ለጌገ ክምሰል ምስምስ ፈሪስ ውዑል ለትዐለብ። ለገብእ ውዑል እት ሸፊሕ ምራድ ዔብ ክም ቡ ዲበ ጽበጡ በህለት፡ ዲብ ኑዕዩት/ጠቢዐት፡ ሀይፍ ወሀውየት መትወዓዕለት ለከሰሰ፡ ዎሮ ዐቢ ወአሳሲ ከጠ ጀረ ምንገብእ፡ ፍገሪቱ ፈሪስ ውዑል ገብእ። እትለ ውዑል እግል ልእቲ ለኦትሻከተዩ ሰቡብ አው ናይ ፍክር ጌጉ ለለሐድድ አው አሳሲያይ ጌገ ኢገብእ ምንገብእ፡ ክምሰል ሰቡብ ፈሪስ ውዑል እግል ልትነሰእ ኢቀድር።

እግል መሰል፡ ሐቲ ወለት 50 ሰነት እሲት ናይ መኪነት ውዕል ክራይ እንዴ አምሰለት ዲብ ናይ ዝቤ መኪነት ውዑል ፈርመት።

ዲብ እለ እግል ጠቢዐት ወሀደፍ ናይለ ውዑል ወዋጅባት ውዑል ለደርር አሳሲ ላቱ ጌገ ሰበት ህለ፡ ለእሲት እግለ እብ ጌገ ለፈርመት እቱ ውዑል ዝቤ፡ እግል ተአፍርሱ ትቀድር።

ቀሽ ቀሽ በህለት እብ ደሚር እኩይ ወከይነት እግል መትወዓዕለት ዲብ ውዑል ካጢ ለለኦቲቱ። ዲብ እለ ምራድ መትወዓዕለት እብ ቀሽ ዲኢኮን፡ እብ ቀልብ ሐር ወገበይ አማን ሰበት ኢተህዩቤ፡ ለገብእ ውዑል ፈራሰ ተ። ዎሮ መትወዓዕላይ እብ ናይ ብዕድ ቄሻይ አሰለብ አሰክመ ህግዩ አው ለመድ ገበይ ሸቅል አውመ ለነፈር ለሓርያይ እግል ልወድሐ ለዐለ እሉ ቴለል፡ እብ ቀሽ እንዴ ኢወደኦ ሰበት ተርፈ ዲበ ውዑል እብ ዳረኮት አተ ምንገብእ፡ እግለ ውዑል እግል ለአፍርሶ ቀድር።

እግል መሰል፡- ክልኦት መሳኒት ኤረትርዩን ዲብ ከነደ ለነብር ህለው ኒበል። ለዎሮቶም ዲብ አሰመረ ቤት እግል ልዛቤ ለሐዘኔ ሰበት ዐለ፡ እግለ ካልእ መሰኒሁ፡ እብ ሰቡቴ ሐብሬ ለሀይብ። እለ መሰኒሁ ህዩ ዲብ አሰመረ ምልክዩ፣ ላተ ቤት ህሌት እዩ እንዴ ቤል፡ ቤቱ ለኢገብኦት፡ ለትሰነዐ ሰነድ ምልክዩት እንዴ አርኤ፡ እግለ መሰኒሁ እንዴ አትአመንዩ፡ ቤት እግል ለአዝቤ እቱ ትዋፈቀው። እግል እለ ለትዘወረ ሰነድ ምልክዩት እንዴ ረኦ፡ እብ ህግዩ መሰኒሁ እንዴ ትሻከተ፡ ለቤት ሰበት ዐጅቡ፡ እብ ዎሮ ለትቀረረ ዐውል ዋፈቀው ከውዑል ዝቤ ቤት ዲብ ከነደ ወደው። ዲብ እለ ቀድዮት አፍዓል ቀሽ እብ ገበይ መዝብያይ ሰበት ህሌት፡ ውዑል ዝቤ እግል ልፍረስ ቀድር።

መትነፈዕ ሐለት አው አትፋረህ

መትነፈዕ ሐለት አው አትፋረህ እምብል እት ህሌ፡ እብ ሐለት አው እብ አትፋረህ፡ ለናይ አማን ንዩትከ ወሕርዩትከ እበ ልጻረር አግቡይ እንዴ ትቀሰብከ ለገብእ ውዑል በህለት ተ። ዎሮ መትወዓዕላይ ዲብለ ምስሉ ልትወዓዐል ለኢትወጅብ አትፋረህ በህለት፡ እግለ ሓላት ዲብ ሕሳብ እንዴ አቲኩ፡ ለገብእ ብዕድ ራቴዕ ሕርያን እግል ልንሰእ እትለ ኢቀድር እተ ደረጀት፡ እበ ሓሚ ወሻፍግ አትፋረህ ዲብ ውዑል እግል ልእቲ ዶል ልትቀሰብ፡ እግለ ውዑል አው ሓላት ናይለ ውዑል፡ እግል ለአፍርሰ ቀድር።

እግል መሰል፡- ለአትፋረህት ዲብ አርወሐት ናይለ መትወዓዕላይ፡ ናይ ውላዱ፡ ዋልዴት፡ ጼዋሁ፡ እት መምተልነቱ ክብድት ወውቀት ለኢተህይብ ብቆት እግል ለአጅሬ ለቀድር አትፋረህ እቡ እንዴ ትቀሰብ፡ እምበል ሕር ንዩቱ እንዴ ትወዓዐለ አረይ አትፋረህ ለገብእ ነፈር፡ ሀለዮት ናይለ አትፋረህ እንዴ አፍሀመ እግል ለአፍርሱ ቀድር። ለገብእ አትፋረህ እግል ዎሮ ለመዘን ነፈር ጨቅዋ ለወዴ እቱ ቱ እንዴ ትበህለ ለልትቀየም እግል ልግበእ ቡ።

ልተላሌ....



መድረሰት የርዲን አስማጥ እት መደት ሰውረት ዲብ ሐን ኦብዓት ወዕጪይ ለትአሰሰት፡ ብዝሓም ዋቅያም ዕልም ለአፍሬት ወሐቀ ሕርየት እት ዋወር መባኒ ለትዐዴት ወምን መሓብዕት ኦብዓት ወዕጪይ እት ድጌ ተጠውር ለዴረት፡ ምን ክርን መዳፊዕ ወዋያራት እንዴ አባሬት፡ ሽማል ሕርየት ብሩድ ወነሺድ ሰራይር ሰላም ሐንላ ሰርብ፡ ዐቅብ ወቅሰለ ተኣተናሴ ለህሌት መትሐድራይት መድረሰት

ሀበሮመ ደረሰ ትትክበት ጸንሐት። ምን እት 2ይት ደረጃት ለትዐዴት እቲ ወቅት ህዩ አሰክ ሳወ ሴዕ ድፍዐት እትብግስት ህሌት። መድረሰት የርዲን ምንዲ ኢትዐሌ፡ ለባካት ለህይ ሸዐቡ እት ለትፈናተ መናጥቅ ናይ ምግባይት ወካልኣይት ደረጃት ምህር እግል ልርከብ ሰበት ኢቀድር፡ ብዝሓም ደረሰ ምን ዕልም ወትሐረመው ዐለው። ከዲብ እሊ ኦብታዝ ጅምዕ ዐ-ሰማን፡ ክእነ ልብል፡-



መዲር የርዲን አስማጥ አብታዝ ጅምዕ ዐሰማን ተ። መትሐድራይት ዶል እንብል፡ “ደረሳህ እት ቀብተ ለነብር፡ ወእብ ቀዋኒን ለልትደየር፡ እምበል ምህርሆም ብዕደት መስኦለት መንበረት ምን ግርዖም ለትከፊት” በሀለትና ተ።

እተ ሐልፈ ወክድ ቅሩብ ዲበ ምዴርየት እብ ሸቅል ዲበ ተሐረክነ ዲቡ ወቅት፡ ምስል ሙዲርለ መድረሰት ለሀለ በዲር ኖሰ ለአፍሬቱ ደረሳየ ወኖም ኖሰ ትትቀወድ እቡ ለህሌት መስኦለ ለሀለ፡ ኦብታዝ ጅምዕ ዐ-ሰማን ለወዴናህ መቃበለት እግል ንቀድም እልኩም ተ ከዲበ ጽበጠ።

የርዲን አስማጥ እት ኦጎስት 1985 ዲብ አስማጥ-ዐዳይ ለትትበሀል ኦካን (ሕሊል ዘረ) አንበተት። መደት ሰልፈ መኣንብታይት ደረጃት እንዴ ዐለት፡ እት ሰነት 1990 ዲብ ምግባይት ደረጃት ተዐዴት። እት ሰነት 2004 ህዩ ዲብ 2ይት ደረጃት ትወቀለት። እምበል ደረሰ አስማጥ፡ እግል ደረሰ ምዴርየት ሰልዐ፡ ከርከበት ወሐልሐል እንዴ ትከብተት እት ዐግሎ ዕልም ተዐግል። እተ ምግባይት ደረጃት ለዐለት እቲ ወቅት፡ ምን ምዴርየት

“እለ መድረሰት የርዲን እብ መድረሰት አስማጥ ትትአመርመ ድኢኮን፡ እግል 4-5 ምዴርያት አቅሊም ዐንሰበ ሰበት ትከድም፡ ወመብዝሐ ሸዐብለ ድዋራት ድቡራም ሐረሰቶት ሰበት ቶም፡ አጀኒቶም እግል ለዐልሞ ሰበት ኢቀድር፡ እለ መድረሰት የርዲን እብ ሕኩመት እንዴ ትፈተሐት፡ ሸዐብለ ሀደግናህን አርበዕ ምዴርየት ክም ልትነፈዕ ምን ጋብእ ሀሌ። ከእብሊ እለ መድረሰት እለ ልብ ናይ አርበዕ ምዴርየት ተ እግል ኢበል እቀድር። እለ መድረሰት እለ ምን ኢትዐሌ፡ ለድቡር ሐረሰታይ አጀኒቱ ምን ምህር ወትሐረመ፡ ሙስተቅበል ናይለ ጂል እግል ኢልጸልምት፡ ምህመተ ዲብ ሸዐብ አስማጥ፡ ከርከበት፡ ሰልዐ ወሐልሐል (እንረኩበት) ሰኒ ዐባይ ተ። ሰበት እሊ፡ የርዲን አርወሕ ናይ ደረሰ አስማጥ (90%)፡ ክምስልሁመ ናይለ ብዕዳት ምዴርያት እሊ ድዋራትን እግል ኒበለ እንቀድር፡ ወእሊ ሸዐብ እሊ ምን ጀህል እድሕንቱ ወእፍዝዕቱ ህሌት።”

እግለ ሳወ ለልትከረው ደረሰ፡ ቀደም ብጋሱቶም ለጉበእ እሎም ጅህድ እቲ እት ልትሃጌ እስታዝ ጅምዕ፡

“እብ መድረሰት የርዲን ለጉበእ እሎም ጅህድ ህለ ወእብ ምዴርየትመ ህለ። እተ መድረሰት ለማዳት ለምህማት መደርሲንን ደጉም ወዱ እሎም። ለደጉም ናይ 9ይ፡10ይ ወ12ይ ፈሰል እት ጉበእ፡ 11፡ፈሰል ለዶለ ደሩሱ ሰበት ህለው፡ ለደጉም እብ ዋጅብ ጉበእ

እሎም፡ እምበልሁመ እጅትምዓት ትሉሉይ እብ ክሰሰለ ንዙም ወወሰክ ምህርሆም ጉበእ እሎም። እብ ፍርዕ ውዛረት ተዕሊም፡ እዳረት ወልጅነት መድረሰት እት ምህርሆም እግል ልፈደሶ እጅትምዓት ጉበእ እሎም።

ድራሰት ኮምፕዩተርመ ነህይሶም፡ መዕመል ከማን እበ ሕድት ቅድረት ኣላት ነኣትላምዶም። ቀደምለ ብጋሱቶም ህዩ እሊ ሸዐብ እሊ፡ ምን አጀኒቱ ለጠምዐ ሐበት ሰበት ይህሌት፡ ምን ጂቡ ለአትፋገረዩ ማል፡ እግል ክል ደረሳይ ናይ ሰርሓሁ ምን 500-800 ነቅፈ ለትጉበእ ሰላዲ ክም ልትህየቡ ወሄሰት ሰርሐ እንዴ ጉበኣት እሎም፡ ምን እለ ጎነ ሕበር ነኣትብግሶም። እሊ ህዩ እምበለ ዋልዴኖም ለልሀዩሶም ተ ማል ወኣትሳጅያት፡ እብ ደረጃት ምዴርየት ለልትዝም እሎም በርናምጅ ሰርሓ ተ። ለነኣትብግሶም ደረሰ ምን ምዴርየት አስማጥ ልግብኣ ወምን ብዕድ ምዴርያት እበ ኢከሰሱ፡ ለምዴርየት እብ እዳረተ፡ ውዛረተ ወሽዐበ ሕበር ደዐ ወዱ እሎም፡ ዐዙመት ትጉበእ እሎም ወእብ ዕላል ለኣትበጉሶም። መዕነውያቶም ለወቅል ምን መምተለካት ወምክር ሐበት ኢጠምየ ምኖም። መድረሰትመ እብ ጀህተ ለትቀድሩ ናይ ኣላት ምህር እግለ ደረሳህ ተህይብ፡ ወእግለ ድቡራም ደረሰ ክም የታይም ወአዋልድ አንሳት ናይ መምተለካት ሰዳይት ሳቡን፡ ሰከር ውበዕድ አሸየእ እግል ኩሉ ለከፊ ምንመ ኢትረክብ፡ እንዴ ዐቃቀረት ደረሳህ ክም ልትዓወኖ ትወዴ። እሊ ህዩ ምን ናይ ሰነት ማል መድረሰት ለተርፍ ገሌታይ እግለ ድቡራም ክም ልትካፈል ትወዴ ወትሰድኖም። ወእብለ ገበይ እለ መድረሰት የርዲን ሰነት ካምለት ትከድሞም ለጸንሐት ደረሳህ ምስለ ሸዐበ ወእዳረተ እንዴ በዋረት ዲብ ወሬሕ ጁላይ ናይ ክል ሰነት እብ ውቁል መዐነውያት አሰክ ሳወ ተኣትብግሶም።

መድረሰት የርዲን እብ ፍንቱይ ወምዴርየት አስማጥ እብ ዓመት፡ እበ በዲር ቀደም ሕርየት ወኣዜ ሐቆ ሕርየት ለአድረሰቶም ውላድለ ባካት ርህየት ክም ህሌት፡ እብ ፍድብናሆም ህዩ ምን ህለው ለልትበሎ ደውለት ለትትሐበን እሶም ፍራስ ዕልም ክም ቶም፡ ናይ ውቁል ምህር ድራሳቶም በሀለት ሸሃደት፡ ዲፕሎማ ወዲግሪ እቡ እንዴ ትደሐረው እት ለትፈናተ መካትብ አፍረዐት ውዛራት

ተዕሊም፡ ዓፍየት፡ ሐርሰ ወእዳረት ሸቁ እለ ክም ህለው ኦብታዝ ጅምዕ ወዴሕ። ለምዴርየት እብ ደረሳህ ተ ትትከ'ደም ለህሌት፡ “ኣነ ኖሺ ዮም ሙዲር የርዲን ለህሌት፡ ናይ መኣንብታይት ወምግባይት ምህርዩ ዲበ እንዴ አክለሰኩ፡ ናይ 2ይት ደረጃት ምህርዩ ወናይ ጃምዐት ድራሰቹ ክም አትመምኩ፡ ዲበ እንዴ መጽኣት አደርሰ ወእደይር ህሌት፡ 70 ምእታይት ናይለ እት የርዲን ለአደርሶ ለህለው ምደርሲን ህዩ፡ እብ ዲፕሎመ ወዲግሪ እንዴ ትደሐረው ለአደርሶ ዲበ ለህለው ፍሬሃ ቶም እሊ ሐዲስ ፍሬ እግል ልጽረሶ ሸቁ ለህለው” ወሰክ።

ምን 10ይ ፈሰል ወለዐል ለጉበእ ጅህድ ውቁል ምንመ ጉበእ፡ እተ ምግባይት ደረጃት ኣሳሰ ለኢጸኔሕ እሎም ደረሰ ብዝሓም ሰበት ቶም፡ ለልኣትካርሞ ወሐፊመ ሕምቅ ለልኣርኡ ህቶም ቶም። ምናተ እብ ዓመት ዶል ልትቀየሞ ደረሰ የርዲን አስማጥ እት ክል መጃል ተዕሊም መትጃግረት ወፈዳብያም ቶም።

ዋልዴንመ ውላዶም ምን ለትፈናተ መጃላት ተዕሊም ውቁል እንዴ ትከረጀው እንሰር እሎም እግል ልክደሞ ወሐዎም እግል ለዐልሞ፡ ክምስልሁመ መሰል ሰኔት እተ ምዴርየት እግል ልግብኣ ወምን ቅሩብ ዋልዴኖም እግል ለዓውኖ እተ ምዴርየት ዶል ልትወዝየ ደሚርም ርዮሕ ተ። እተ የርዲን ለህለው ደረሳመ ውላድ ድጌሆም ወሐዎም ዶል ለአደሩሶም፡ ለበይኣም ሸዐር ወመዕነውያት ቀሊል ኢኮን። “እሊ ወድ ሓልዬ፡ ወድ ዐመቼ፡ ወድ አቡዬ ወሐዬ እለ ደረጃት እንዴ በጽሐ ኣዜ እግልነ ለአደርሰ ህለ፡ አናመ እለ ደረጃት እለ እግል እብጸሐ እቀድር” እንዴ ቤለው ሸንህት እት ድራሰት ወፍድብን ቅንእ ለበይኣም ሸባንመ ሕዳም ኢኮን” ልብል ኦብታዝ ጅሚዕ።

መድረሰት የርዲን ዮም ዓመት 1500 ደረሳይ ክምስል በ፡ ምን እሎም ህዩ 500 እት ምግባይት ደረጃት ለህለው እት ጉበኣ፡ ዲብ 2ይት ደረጃት 1000 ደረሰ ክብትት ህሌት። ምን እሎም 380 አዋልድ ተን።

“እተ መድረሰት ለሸቁ ስታፍ (ምደርሲን፡ ምረብዩን ወእዳረት መድረሰት) 92 ሸቃላይ ጉበኣ። ምን እሎም 30 ምደርሰ ብነ።

ሕዳን ምደርሲን ህለ እግልነ። 38 ምደርሰ ለወጅቡ፡ ናይ ገሌሁ ሕሰስ ምደርሲን ሰበት አለብነ፡ ሕዳን መዐልሚን ክም ብነ ልትረኣኔ። እብ ፍንቱይ ናይ እንግሊዝ፡ ሕሳብ ወፊዚክስ ምደርሲን ሕዳም ዲብነ ህለው። እብ ዲግሪ ለድሐራም 2ይት ደረጃት ለአደርሶ ወዲፕሎም ለድሐራም ክልኤ አንሳት ለብኣቶም ህዩ ምግባይት ደረጃት ለአደርሶ ህለው።

ለብንያን እግል አፍሱል፡ ሰከን ደረሰ (አዋልድ ወውላድ በንበን) ወሰከን ምደርሲን ኩፋል ተ። ሐማማት ወምስትረሓትመ ብኩይ እግላቱ። ለአፍሱል ገዲም ወሐዲስ እት ጉበእ፡ ሰማን ፈሰል ጀዳይድ ወ12 ፈሰል ህዩ ገዳይም እብ ዓመት 20 ፈሰል በ። ሐቲ ክፈቱርየት ዐባይ፡ መክዘን መሻሪፍ፡ ቅርፊት ኮምፕዩተራት፡ መዕመል ወመክተብትመ ምን ምህም መባኒ የርዲን አስማጥ ተ።

መድረሰት የርዲን ትትበኔ እንዴ ህሌት፡ እግል 500 ደረሳይ ሰበት ተሐሰበት፡ ጭብ ኦብያት ሰከን ደረሰ ምን አግደ መታክላ ተ። እሊ ህዩ ዮመቲ ደረሳህ እብ ሰለሰ ዕጹፍ ውሰካም ሰበት ህለው፡ ጠለብ መባኒ ሰከነ ምን ጉበእ ወአፍሱለ ታምም ኢህለ። እግል ትውሰዕ ዲበ ለትቀድር አርደትመ አለበ መድረሰት የርዲን። “ገሌ ደረሳነ ምን መድረሰት በረ ምስል አዳምም ልግበእ ወእት እጃር ለነብር ብነ፡ እሊ ህዩ ለደረሰ ክምለ እለ ነሐዝዮም እግል ገራቅሶም ሰበት ኢለኣተቅድረነ፡ ሐል እግል ልግበእ እሉ ምስለ ከሰሶም ጀሃት ለንትሃጌ እቡ ጋር ተ” ልብል ኦብታዝ ጅሚዕ ዐ-ሰማን። ከሰከን ውላድ፡ መካትብ ሙዲር ውብዕዳም አንፋር እዳረትለ መድረሰት፡ ዘረቡት ድህርት ሰበት ተ እግል ትትወቀል ከትትበኔ፡ ሚዳን ክወር እግር ወሾሊሶል ወቃዐት እግል ፍርቀት ዓዳት ምን ሐል ሻፍግ ለልኣትሐዝዩ ብንየት ትሕትየት ክምስል ተ ኦብታዝ ጅሚዕ ወደሐ እግልነ። ከመድረሰት አስማጥ አስራር ደም ወልብ ናይለ እት አስማጥ ወግዋሬህ ላተን ምዴርያት ለነብር ገቢል ሰበት ተ፡ ብናህ ምን ጉበእ ወለልኣሸቅየ ስታፍ ድቁብ እግል ትምለክ ወገጽ ቀደም ትሄርር ትምኔት ክል ሐዝያይ ዕልም ወመትቀዳም ተ።





ሃራር ስህክ ተሕራር ነቅፈ



ዶክተር ተሸሰቱ ፍቃዱ “ሃራር ምን ነቅፈ አሸክ ነቅፈ” ለልብል ከታብ ዐቢ ካትብቱ ለከታብ እብ ከማሉ እት ዓሙድ ሰጅል እግል ልፍገር ምንመ ኢቀድር፡ ቀደም እለ ገሌ ምኑ እትሊ ዓሙድ እሊ ፋግር ዐላ። ምስል ዐመልየት ተሕራር ነቅፈ ወክርዶን ነቅፈ ተእሲሲ ናይ እስተዝሮረት ውሕደት ዐመልየትም ለተዘርተ። ዶክተር ተሸሰቱ ወብርሃን ሃይሌ ህይ ለውሕደት ዐመልየት አሰሰው ናይ ሰልፍ ሐካይም ጀብሁት ሽዕብየት ዐለው። ከከርብ ነቅፈ እተ ናይ ደንገበ አውካድ ሚ መሰል ዐለ ወእብ ከኤፍ ተአምቡት ለከሰሰ ጸብዮ አውላይ ክፈሉ እግል ንርኡ።

ዶክተር ተሸሰት ዲብ ቁት ጠብረ እሰሰት ለዐለት ዕድረት ዐመልየት እንዴ ገብኦ እግለ ምን ነቅፈ መጽሔም ለዐለ ምጅረሒን ዲብ ሰፍፍ ወዐመልየት ዲብ ወዴ ሐድ ሰሰ ወራሕ ካልኦ ዐላ። ሐርብ ተሕራር ነቅፋመ እተ ከምስልህ ሳድሰ ወርሐ ጸብዮ ዐላ። ሐቲ አምዕል ቁት ሳዕት 400 አልዐር ዮም 18 ማርስ 1977 ቱ ለዐላ። ምር ሻብ መናድል ምን እምባልቀ ምር ድብኦ ጀዋብ እንዴ ጸብጠ እግልዬ መጸኢ። ምን ቃእድ ጀብሁት ክምሰቱ ህይ ሐብራ። እት ቀደሙ እንዴ አክሰትኩም ክምስል ረኡኩም፡ “ፈጅር እሰቡሕ አሸክ እምባልቀ ክምስል ትመጽኦ ዴ” ልብል ዐላ።

ቃእድ ጀብሁት እብ ሰብትላ ህለ እግልነ ኣላት ሕክምን ወሰራይ ክምስልሁመ ለዐለው እግልነ ብዘሐ መጀርሒን እግል ለኣምር ሐዘ ገብኦ እንዴ እቤ ጌመማ። ክልዶል ቀደም ክል ነፈር ምህም ዐሸርያይ ህጃም ክኢነ ላቶም ወብዕድ እግል ልትአመር ለቡ እንዴ ትላክ ልሰኣል ወለለትሐዜ መዳለት እግል ኒዴ ለሐብረኒ ሰብት ዐላቱ ክምስልሁ ለጌመማ። ሰብት እሊ እግለ መጽኦ ዐመልየት ዐሸርያት እግል ንዳሌ እግል ለአሰኣኒ ክምቱመ ኢቀዩኩም።

ዲብላ ሳምን ለህ “በሕ ሰለሰ” እት ረኣሰ ነቅፈ ናይ ተደምጊር ህጃም ለገብኦ እት አምዕል ታመት ክምስል ህሉት ልትህደግ ሰብት አሰመኑ ለልታኪነ ህለ ዳይ ቀለል ክምስል ኢገብኦ ምን ሰልፍዬ ጌመሙ ዐልቱ።

ዲብላ መደት ለህ ዐሳክር አቶብዬ፡ እግል ቅርረ ዲብ ካልኣይ ቀብረ ለቁሳመ ዐለው። መደውሻሽ መዐሰከር ሀብረንገቀ ህይ፡ እግለ እሊ መሰል መዐሰከር ብዕድ አብሀረረዬ ወእግል ጄሽ ህይ ዛይድ ኤማን ሃይቡ ዐላ። ለናይ ቅርረ ጄሽም ለላይፈዩ ደማር ወመትሸዕታር፡ ዐሸሐሪ መሐጌተ፡ ዲብ ከርሰ መዲነት ነቅፈ ምስል ክርዱም ለዐለው ጀማዐቱ እንዴ ገብኦ ዲብ መዘከረቱ ለሰነደዩ

ክምስል እሊ ለተሌቱ፡ “...ናይ ቅርረ ዐሸሐሪ ሐቀ አውረሐት ብዙሕ ክምስል ትከርድ። ሕክመት ወለ ሴመ ሰብት ኢወዴት እሊ ዲብ ደንገበ ሰፍረ ርሳሰ ሰብት አክለሰዩ ለትትቀደሩ ምንመ ጀሪቤ ለመደት ሞተ ወለተርፈ አሸክ ሰ-ዳን ሰለመ” ልብል።

እሊ ለወዴሕ እግልኑ ዲብ ቀብት መዲነት ነቅፈ ለዐለው ዐሳክር አቶብዬ እንዴ ዳየሰው ዐራት ጸብዮም ክምስል ዐለው ሌጣቱ።

እተ ምሴት ለህ ዲብላ እብ ጊም ግልቡብ ለዐለ ቅሩር ሕሊል ጠናቤ ምስል ሐምስ ምን አንፋር ውሕደት ዐመልየት እሳት ዲብ እንሰሕን አምሴ። እብ ሰብትላ ርሳሰት ወምስለ ለልጸባዋ ቅደይ እግል ሕሰቤ ለዐለ እግልነ ኣላት ወሰራይ እግል እጅመዕ ወአንቅሰ እንዴ ይአቀሰንቱ ለአምሴ። ለጀማዐት፡ ዶልዶል ዲብ ሕሳባት ሽመም አክለ ረኡውን “ዮም ሃልካቱ?” ዲብ ልብሎ ትሰኣለውኒ። ሰኣለም ላኪን ይአደቀብው እቴ። እብ ደቅብ ምን ልሰኣለኒ እንዴ ጨመው ለጀሌሕ ዲኢኦን ምስጢር ልብዬ ላተ ወኢደለው። እግልሚ ዲብላ መደት ለህ ጀላብ አምን ወመንገፍ ተንዝም ሕፍዘት ምስጢር ሰኒ ትሩድ ዐላ። ለልትህደብ መምርሕ እግለ ገብኦ ለኢከሰሰ ኡም ነሽር ጀሪመት ቱ ለዐላ። ክል ነፈር ለከሰሰ ሌጣቱ እግል ልውዴ ለዐለ እሊ። ለሐብሬ አሸክ ብዕድ እግል ትብጽሕ ተሐዜት ምንገብኦመ እበ ከሰሰ ጀህት ሌጠ እግል ልግበኦ ቡ። ምን ጠናሰ አሸክ ጀውት ነቅፈ አው ህይ አሸክ አሰመረ ምን እግል ለኡብጽሐ? በጽሐ ምንገብኦ ህይ አባይ ለወደዩ ዐለ እሊ ገብኦ? ክሉ ማይት ቱ ለዐላ። ለምስጢር ገብኦ ምንገብኦ ላተ ቅርዱ ቅርድ ልሐቱ ለዐላ።

ፈጅራተ ሳዕት ሰባ እሰቡሕ ምስል ምር ምን አንፋርኩ አሸክለ ቃእድ ጀብሁት ለዐለ እት ኣካን ትብገሰ። ምን እምባልቀቱ አሸክ ሐላይ እግል ንፍገር ለዐለ እግል።

ፍንጌ ጠብረ ወእምባልቀ ደብር ኢትጨንደቅ ቱ ለህላ። ክልዶል እብ ምውዳቅ ጸሓይ ናይ እሊ ደብር ገናድ እሊቱ አሸክ እምባልቀ እንገደሰ ለዐል። ለተቃርብ ህይ ህተ ዐለት። እተ መደት ለህ ላኪን እብ ጀህት ምፍጋር ጸሓይ ናይ ደብር ኢትጨንደቅ፡ አሸክ ጋደሞታት ነቅፈ ለደንን እንክር ምፍጋር ጸሓይ ናይላ ደብር እሊ፡ እግል ንሕለፍ ሐሬቱ። ምን እብ ጀህት ምውዳቅ ጸሓይ ለህሉት ተቃርብ እንዴ አዘም። እብ እንክር ምፍጋር ጸሓይ ሕግስ እሊ ደብር እሊ እግል ኢጊስ ለትሸህቡ እቡ ሰብ ዐለ እግል። እብ ጀህት ቅብለት፡ ግብለት ወምውዳቅ ጸሓይ ናይ ደንገበ ከርዶን ነቅፈ ከፍ ክምስል መሰል እግል

እርኡ እትረመጭ ሰብት ዐልቲቱ። ሰብት ለከርዶን ሻፍግቱ ለዐላ።

ሕሊል ጠብረ እንዴ ጸብዮን ጀህት ምፍጋር ጸሓይ ገጽን እንዴ ሄረርን ዲብ እንክር ቅብለት ምፍጋር ጸሓይ በህለት ዲብ ደንገበ ሕግስ ደብር ኢትጨንደቅ በጽሐ። እተ ወክድ ለህይ ሸክት ግብለት ለትትዐጸፍ ገራብት አሸክ እንረክብ ሄራርን አተላሌ። እብላ ቀጣን ገራብት እብ ሕግስለ ደብር ሸክት ግብለት፡ ሕሊል ወክረቢት ዲብ ትትዐርሬ ትክ እንዴ ትብ ለትገደሰት። እብላ ገብይ እሊ እግል መደት ደቃይቅ ብዙሕ ክምስል ሄረርን ምር ምን ድሬዕ መጽኦ ለዐለ ነፈር ቦጦላኒ 607 ትከብቱ። ናይ ጀማዐትን አባይ ሰዋትር እብ ዋዴሕ እግል ለርኡነ ህይ ትሰኣልናህ። ዲብ ወክድ ሐጨር አባይ ጀው እሸክታሙ ክምስል ዐልነ ነኣምር ሰብት ዐልቱ ለኣግደ እብላ ገብይ እሊ ለኦመጽኦነ እቡ ሰብሰመ እሊ አማን እሊ እግል ነኣክድ እንዴ እምቤቱ። ምን እሊ እግል ነኣክድ እንዴ እምቤቱ። ምን ሐብሬህ፡ ሰዋትርን አሸክ ሰዋትር አባይ ሰኒ ናሽብ ክምስል ህለ ሌጠ እንዴ ኢገብኦ፡ ለከርዶንመ ናይ ደንገበ ሸክሉ ክምስል ጸብጠ እግል ንፍህም ቀደር።

ዲብ ሕሊል እምባልቀ ክምስል በጽሐነ አንፋር ሕክምን ቦጦላኒ 607 ሰኒ ተሐደረው።

ምስል ሰለሰ ብዕዳም ጀማዐት ዲብ ምር ደሽዕ (ዳስ) ዓረፍ። እግል ክልኦት ምን እሉም ሰለሰ ጀማዐት ቀደም ክልኦ ሳምን ዲብ እሊ ኣካን እሊ ውጃህ ምስሉም ለዕልቱ። አዜመ ቴለሉም ክምስል ዐልነ እቱ ወቅት መሰል ዐላ። እብ ፍንቱይ ጀሬርፍ ግሱይ ለዐለ እብ ሸቅል ሰኒ ታልፍ ክምስል ዐለ ገርቡ ለሐብር ዐላ። ለጀማዐት፡ እደዮም ወገጽም ነዲፍ ምንመ ዐላ፡ ብዕድ ገርቦም ላተ ዲብ ጨባል ቀደሕ ለኣንገርግር ለወዐለው መሰል ዐላ። እብ ፍንቱይ ጨገርም ወልባሎም። እደዮም ወገጽም ነዲፍ ለዐለ እቡ ሰብቤ ሐሬ ክምስል ፈላምኩም ክምስል አተው ሰብት ተሐጸብውቱ።

ዕንዱቃሙ ለዐለው ኮላይ እንዴ ፈትሐው ዲበ ምድር ካርያሙ ዐለው። ምስል ክል ክፍፍ ህይ ፍንቱይ ሶኸ (ረዩም እብ ክልኦት እንክሩ ብልከት ጀርደት እግል ልትረክብ እቱ ለቀድር) ዐለ እሉም። ለካልኣይ ላኪን ኮላሺን ተዐጻፊት ዐለት እሊ። ዲብላ ወክድ ለህይ ኮላሺን ሐዲስ ለጸብጦ አንፋር እግል ፍንቱት ዐመልየት ለልትላክቶም ለዐለው። ለልትዐጸፍ ኮላሺን እንዴ ዐጸፍኩህ ዲብላ ሐዜነህ ኣካን እብ ቀለል እግል ትኡቱ ሰብት ቀድር ቱ። እሉምመ ምን እትሊ ወቀይ እሊ ለልትፈረር ለልትፈንተው ክምስል ኢኦን ፈላም። አክል አይ ለለሃልክ ወክቡድ ሸቅል ፍሩራም ክምስል ህለው እት ሐሰብ እግለ ምስል ለህቡቶም ለትረክነ በለሉቶም፡ እት ረኣሰ ልባሎም ለዐለ ጸብራ ናይላ እት ባቶፍ ለዐለ ዲብ ብርኩ ለተህትህተ ሰርዋን ለለብሰ ዲብ አቀምት፡ “ዲብ ሚ ፍንቱይ መሃም ገብኦ እሰሙናም ዐለው?” እንዴ እቤ ዲብ ሐሰቤ ምር ምን አንፋር ሕክምን ቦጦላኒ 607 ሰብት ኣተ፡ ምን ሕሳባቹ ከርሚ። ሰላም እግል ኢበሉ ህይ ቀንጽ። እንዴ አትሊኩመ ዲብላ

አምጽኢኒ ጋር ኣቱ።

ለአምጽኢኒ ጋር ምስል ክብርም እንዴ ኣትመም፤ እት ብዕድ ደግምን ኣቱ። ህቱ ሐሬ ክምስለ ደግመዮ እግልዬ ለጀማዐት፡ ለእብ አባይ ፍንጌ ድሬዳትን ወደፍዓቱ ድፋን ለዐለ ኣልቃም እግል ለኣፍግር እግል መደት ኢያም ዲብላ ሸቅል ጽሙዳም ለኣስመገውቶም። እብ ተውሳክ እብ ክል እንክር ነቅፈ እሊ ሸቅል እሊ ለኣተላሌ ክምስል ህለ ሸርሐ እግል። ዲብ ሰሩ ምህም ኣካፍት ላኪን እግል ህጃም መዘገበ ለገብኦ ኣካፍት ጸርጋም ክምስል ህለው ወደሐ እግል። ለዲብ ክፋፍም ዐለ ሶንክታት ህይ መፈተሽ ኣልቃም ልትነፈፆ እቡ ክምስል ዐለው ፈላም። እሊ ቴለል እሊ ክሉ እንዴ ጀምቡ ህይ ናይ ደንገበ ህጃም ነቅፈ ሸእግ ክምስል ህለ ትቶታዝ። ዲብ ደንገበ ህጃክ አሸክ ኣካፍትሰ ቅደደት (ሐላይ) እገደሰ ክምስል ህሉት እግል ክብርም ሐብርኩም። ምን ሓላቱ ህይ ሕብሩ ለዐለ መሰለ እቴ።

ቃእድ ጀብሁ ወቅደት ቦጦላኒታት ዲብ ሐላይ እግል ዝያድ ሰሰ ወርሕ ጸንተም ዐለው። እግል እጅትመዕ ወዝያረት አሸክ ሰዋትር ኢገብኦ ምንገብኦ፡ መብዘሐ ወክድ ምን ናይ ቅደደት ኣካን ልትካረው ደዐለው። ሐላይ፡ ዲብ ርሽመት ደብር ዐንግይ፤ ለህሉት ቱ። ትክ ለበለ ታኪ ደብር ሰብት ገብኦ ህይ፡ እበ ቀጣን ገራብት ዲብ ትትለዋሌቱ ለትፈገር ወትትከሬ።

ምስል ክልኦት ነፈር ሕክምን ቦጦላኒ ህይ ትብገሰ። ለክልኦት ነፈር ነብረ ወማይ እግለ ቅደደት ወኣፕሬተራት እግል ለኡብጽሐቶም ዲበ ደብር ፈግር ለዐለው። ዲብላ ኣካንሰ ቅደደት ለገብኦ ሸኦ እግል ሊደው ሰብት ኢቀድር፡ ዲብ አምዕል ሐቱ ዶል ምን ሕሊል እምባልቀቶም ለለትሐዜ አሸክ ለከሰኣ እሉም ዐለው። ሰብት እሊ፡ ዲብላ ኣካንትሰ ቅደደት እምባል ኣፍሊሕት ሻሂ ብዕድ ነብረ እግል ትሸቀ ለልትቀደር ደዐላ። መብዘሐ መናድል ዲቡ ክምስል በጽሐ ትንፋሰ ሰብት ለሐጽር እቱ ሕናመ ትንፋሰክ ሐጽር። ቁት 2000 ምትር ምለዐል ጠፋሐት ቤሐርቱ ለፈገር። ርሽመት ደብር ዐንግይ ድቁብ ሸግል ወብርድ ለበ ኣካን ሰብት ቱ ለቅደደት ወኣፕሬተራት ገርቦም ሐምባላይ እንዴ ገብኦ ጨባል መሰል ዐላ።

ሸውዩ ክምስል ዓረፍ፡ እግለ ናይ እትሳል ኣፕሬተር ጀማዐትን ሻፋም እቱ ለዐለው ድፍዓት ምስል ድፍዓት አባይ ወመካሪት ምድር እግል ለርኡኒ ትሰኣልኩም። አሸክ እንክር ምፍጋር ጸሓይ ናይላ ደብር፡ እግል መዲነት ነቅፈ ለለኸብብ እንዴ ጊሰን ትገሰኒ ወእግለ ጄሽ ሻፍፍ እቱ ለህለ ኣካፍት እብ

ሐት ሐቱ ኣርኡኒቱ። ዲብ እሊ ኣካን እሊ እንዴ ገብኦኩ ክምስል ረኡኩም ዲብ ከርዶን ነቅፈ ሰኒ ተጠውር ዋድያም ክምስል ህለን ዝያደት ወደሐ እግል። ዝያደት ክሉ ህይ፡ ለምህም ለልትብህለ ውቁል ኣካፍት እት ሐን መራቀብትን ሰብት ዐለ ሰኒ ኣፍራሐኒ። ኣብ ልብዬ ህይ “ዕምር ኮላኔል ማሞ ለሐጽር እቱ ገድም ቀርብ” እቤ። ምኑ ዲብላ ቅደደት እግል ልትሃጀኮ ለልትገሰው እቱ እንክር ምውዳቅ ጸሓይ ናይላ ደብር ኣቅባል።

አሸክ ቃእድ ጀብሁት ዐሊ ሰይድ ዐብደለ እንዴ ኣቅባለት ሐቀለ ትገሰኒ። ክምስል ልሙድ እብ ሰብት ገሌ ምህም ቴለል ድሬዕ ውቴለል ዓፍዮት መናድሊን ተሃጀክ። ሐቀ እሊ ዲብላ ምህም ጋርን ተዐዴ። እብ ፍንቱይ እብ ሰብት ብዘሐ መጀርሐን ወሐማይም፡ ለህለ እግልነ ደወ ወኣላት ሕክምን ላቱ እግል ለኣምር ህይ ትሰኣሌ። ለለትሐዜ በሊስ ክምስል ሀብኩም ህይ፡ እግለ መጽኦ ቴለል ዐሸሐሪ እግል ንዳሌ መምርሕ ሀቤ። እብ ተውሳክ፡ መሰኡል ቅሰም ሕክምን ካሬ ሰራይ ወኣላት ሕክምን እግል ልንደኦ ሕብሩ ክምስል ህለ ኣሰኣሌ። እብ ፈርሐት ዲብ እትሳረር ህይ እንዴ ትሳረሐት ምኑ አሸክ ሕሊል እምባልቀ እግል እድሃን ትብገሰ።

ዲብ ሕሊል እምባልቀ እግል ክብርም እንዴ ርክቡ እብ ሰብት መዳለት እንዴ ትፋህምን ትሳረሐት ምኑ ወኣሸክ ኣካፍት ኣቅባል። ህቱ እተ ምሴት ለህ ሰራይ እግል ለኣምጽኦ አሸክ ብሌቃት ልትብገስ ዐላ።

አሸክ ጠናሰ ዲብ ኣቅባል፡ እሰትፋኖስ (ነፈር እምዳድ ወሰፈ) ለተሐሰመዩ ዲብ ደሚርዬ ልትክል እዩ እት ህለ ትዋሰፈ እግል። ደግሞ ዶክተር ንርኢዮ እብ ሰብት ተሕራር መዲነት ከረንመ ትዘከራ። ሐል ሕልም እሰትፋኖስ እብ እሰትሸሃድ ሐድ ክልኦ መዲነት እግል ነከርር ቱ። ለሕልም ቀደም ክልኦ ሳምን ሰብት ዐላ። ለመዳይን ምንመ ኢወሰፈ እዩ ህተን ላተ ነቅፈ ወኣፍዐበት ገብኦ እንዴ እቤ ጌመም ዐልቱ። ናይ ዶክተር ንርኢዮ ሩኣየትሙ እግል ተሕራር መዲነት ከረን ደባባት እግል ለትሐዜ ክምቱ ሻርሕ እዩ ዐላ። ለምሽክላት ደባባት ምን አዩ ልምጽኦ ቱ። እብ ሰለሕ ከፈፍ ሞርታራት ወማሽንጋናት ነቅፈ ወኣፍዐበት ጸብዮ ምንገብኦ እበ ምን ለልሰሉብ ሰለሕ ህይ አሸክ ከረን ንትወክል ከ ዲብ ለልትጸብዮ ደባባት ወድሩዓት መካይን አሸክ ተሕራር ኤረትርዮ እብ ከማለ ንትወክል ዲብ እብል ምስል ርሕዬ ኣሰርኮ ወፈተሐቱ። እበ ጀህት ለሐቱ ዲብ ቤሐር ለውቀት ዲብ ሐምስ እበ ካልኦ ህይ ለሐልፈ ሰባ ወርሕ ለኣለፍናህ መራር ዲብ እትዘር ኣካፍት በጽሐ።



“ክልኤ ሕርየት ረከብነ”፡አንሳት አስማጥ ወሀበር



ተምሳሌዊት ክሽሮ ልሰረት (ሀበር)

ለትክክብ እግል ትትጃዜ እንዴ እንቤ ምን 2000-5000 ነቅፈ ቅራመት ክም ገብኤ እተን ቀረርኩ።

ሐቂሁ እት ሰነት 2007 አዋጅ ጋብሆት ክሽሮ ክም ፈግረ፡ ዝያደት እግል ምዳርየት አስማጥ እት አሰረቶት ክሽሮ እት ወክድ ምን እት ወክድ ወሊድ መይተ ለዐለየ “ሚ ገብኣየ” ዶል ትብል ከትትሰኣል፡ “ዕድር ሐራሳት ቱ ለእቡ ሞተየ” ልብሉኩ። ህተን ላኪን እምበል ክሽሮ ቀሪም ወዕድር ብዕድ አለብኹ እቡ ቱ መይተ ለዐለየ። ለመላዬ አው ላመት ሰግርት ሰበት ትገብኤ፡ ቱታንሰ ለአመጽኤ ዲቤ እብሊ ዲብ ሐቱ ምዕል ክልኤ ወለት ለቀበርኩ እቲ ኢነትመ ነኣምር። ለሐቱ ወለት እባህ እብ ሰብ ክሽሮ እት ወልድ ሰበት ሞተት፡ ሕማም ልብ ሰበት ዐለ እግሉ ለክበር ሞት ዶል ሰምዐት እቲ ዶል ሞተት። እቲ ትራዩመ ወክድመ ሰዐብቱ ብዙሕ ቱ። ክም ከረ ሕሩም ለመሰል መናጥቅ፡ እቱ ለነብር ሕዳሪብ ህለው። ወለክሽሮ ልሰዕ እብዱም ኢህለው። እትለ መንጠቀት 95% ህዩ ምን እሊ ዓዳት ባሊ ፈረጅኝ እግል ነበል እንቀድር ሕነ ስኮን አስማጥ። ወእሊ ሞት አግሩዝ ሐራሳት ወሕረም እግል ትንቀሰ ወግፍዩቶም ትትዐቀብ ሐቆመ ገብኣት፡ ክሽሮ ልብዬ እንብል።

አቡነ እድረሰ መሐመድ ዐሊ ድረዕ፡ ክም ልጅነቱ ወመዝም ጀማሪ ምርት ምን እቲ ምዳርየት ብዙሕ ሰኒን ለሸቀው አበው ወእማት ቱ። እት መደት ሰውረት እለ ምድረት ናደለ እኩይ ዐዋዲ እንዴ ፈሳምኩ ቀበትለ ሽዑዝ ተዕቢኣት እንወዴ ዐልኩ። መሰለኹ እት 1980ታት ቱ። እብ ክሰሰ ሼደሊ፡ ፈሪቅ አንፍ ወእፍጋሪት ዐንቀር እቡ ተጅማዕ ዋዲ ዐልኩ። አልአሚን ሼክ ሳሌሕ እግሉ ለትሃገ ምርት አብ እትዝር። አልአሚን “ዐንቀር ኢትወርኩ” ክም ቢለየም፡ “እንታመ ለክርኽክ እብ ሕንሕንት

ሽዑዝ ዲብ ነኣም፡ ዮመቱ እለ ሕነ አክል ሕድ እግል ንንጌ ምኑ ቀሰም እንክፈ ለህሌን”።

ምን ስኮን ሀበር እሊ ክሽሮ እግል ልብዬ ምናም ልተምነው ለዐለው ወዮም ዛህር ክም ገብኤ ረቢሆም ለሐመደው ሕናመ ምስሉም እተ መናሰበት አብደዮት ክሽሮ እንዴ ሐደርኩ ሚ ክም ልብሉ ሽዑርም ናስኣም ዐልኩ፡ ከመሐመድ አድም ሕፍድለሁ “ ካፍሖት ክሽሮ ንዳሉ ዝያድ ንዳል እስትቅላል ቱ፡ መሕበር አንሳት፡ ውብረት ዓፍዩት፡ ደዳነት እስላም ውብዕድ አፍረዐት ውብራት ኩሎም ምስል ካፍሖ ሰበት ዐለው፡ መጅተመዕመ ሰበት ፈሳመዬ፡ እለ ደረጃት እለ በጽሐኩ፡ ለሽዑብ እብ ከሰላም ጀሃት አትፋዘየት ክም ገብኤ እሉ፡ “እት ደዳነት ሐቱ መሰለሐት አለቡ ወእት ስዮሰትመ ለክምስልህ” እንዴ ቤለው፡ አዝመው ምኑ።



መሐመድ አድም ሕፍድላይ “እምነሽባት ወእምልዳት ዓፋሽን

አክበዬ፡ ሰበቡ ህዩ፡ ወሊድ እት ዕያደት ልግበኤ ለእንቤ እቡ ሰብሎ፡ ህተን ሐቆ ወሊድ እት ሐራሳት ወድሆህ ለዐለየ አፍዳል እግል ለአብዮራህ ምን ሐዘኖ ቱ።”

ዐሰማን መሐመድ ዐብደሊ ምን ስኮን ዳሕየት ማይ-መሌሕ ምን አዘ ክሽሮ እት ለሓኩ፡ “ወለት እንዴ ተህዴት፡ እለ እሲት ኢኮን፡ ገበይ አለብ እንዴ ትበህለት እብ ዕያደት ለትፈተሐት ከእናሰ እቱ ለአቅበለት ነኣምር። ሐድ ርሰሐት ቱ፡ ገበይ ለእብ ፈግር ምንን እንዴ ሐግሉ፡ ሐር ለአቀብል ዲቤን ወልትካጠረ እቡ። ጭብ ትረዕ ወሊድ ሳድፈን ወእብ ዐቢህ መጸኢት ወነፍሰየት ለአመጽኤ ዲቤን።

ንኡሽ ወዐቢ ኩሉ ሕበር ፍህመ ህለ እንብል ወዳምናም ሕኩ፡ ለአዋልድ አሸክ ምግባይ ደረጃት ሰኒ ደርሰ ሰበት ህለዩ፡ ምድረት ክሽሮ ዝያድ ልፍህምህ ህለዩ።

መሐመድ እድረሰ መሐመድ ምን ዳሕየት ዐሪታይ፡ “እት ምዳርየት ሀበር በዲርመ ምን ገብኤ ክሽሮ አክል እሊ ቅቡልየት ይዐለት እግሉ፡ ምን መደት እስትዕማር ነሓርቡ ለዐልናቱ፡ ላኪን ፈሳምለ ሽዑብ ድሀር ሰበት ዐሉ፡ ለገቢል እብ ቀላል እግል ልሕደጉ ኢቀድራ። ምን ዶል ለአዋጅ ክሽሮ ፈግራት፡ አዳም አክል-ሕድ ፈሳመ ወምድረቱ ሰበት አመረየ፡ ወዲብ ደዳነትመ አካን ክምስል አለቡ፡ እንዴ ፈሳመ ወናሱ ለህዩ ሽዑብ ቱ። ለተውዕያትመ ቀለል ይዐለ ላኪን፡ አገድ ትክብተው።”

ሐሊመ መ/እድረሰ “ኩሎም ሚርሐት ደዳናት፡ አጅህዘት ሕኩመት፡ ልጃን ወመጅተመዕ ምስል ምን ሓረበው፡ ተዐወትን ዲቤ። ገብኤ ለዐለ



ሐሊመ መሐመድ መሕመድ

ተዕቢኣት ሐድ ኢኮን፡ ላኪን ለሽዑብ ሳብቅ እቱ ለዐለ ዐዋዲ ክሽሮ አገድ እግል ልጠልቁ ለወዳናህ ጅህድ ሐድ ኢኮን፡ መደረቱ ሰበት አመረ ክሽሮ እግል ልትረፍ ቃድር ህለ። ምን 1984 ወሐር ለሻፈሞት ወለሃለቦት ታርፍ ዐለ። ለጥሁረት ላኪን ለእማት ሰበት ረከዘየ ዲብ ወድሆህ ዐለየ (እብ ሕብዩ)።

ዲን ስሙድን ወኢማን ሰበት ገብኤ፡ ተሪፍለ ክሽሮ ዝያደት ሚርሐት ደዳነት ክም ጨቀጠው ከትሃገው ዲቡ እግል ንትረኩ ቀደርኩ። እት ክሽሮ እንዴ ትፈረደየ ለትክብተሆህ ከለክክሽሽ ወለተን ለአተክሽሽ ለዐለየ እማት፡ እብ ስቱር ጀላብ እግል አልውድሆህ፡ እት ቀበተን እብ ምስጢር (ስቱር) ለሸቁ አንፋር ዋድያም እተን ሰበት ዐልኩ፡ እት ከፍ ሕኩመት እንዴ ትካረየ፡ ቅራመት ለገብኣት ዲቤን እማትመ ዐለዩ። ምስል እሊ ኩሉ ጀህል ናደለ መጅተመዕ ወክሰሰን እማት እሊ ክሽሮ እት በገይዳት ምን ተርፈ ምኒኩ “አልሐምዱልላሂ ረቢ ለዓለሚን” እት ረህየት ምን አማደድኩ።

“ህዳይ ንእሽመ ምን ክሽሮ ወተሐት ይዐለ። ምስል ክሽሮ ህዩ አቅሀመ። እብ ክሽሮ መጽእ ለዐለ መእሲ ሐድ ኢኮን። እብ ሰብ ክሽሮ እት ወክድ ወሊድ ዐመልዮት ለአትሐዘዩን ብዝሓት ተኩ።

እት ምዳርየት ሀበር እት ሰነት 1958 ምርት ክሽሮ ውብዕድ ዲራይ ዐዋዲ ለክር ቀራር ህዩብ ክም ዐሉ ምናት ኩሉ አዳም ሕበር እት ፍዕል እግል ለአውዕሉ ምን ኢቀድረ ወዲብ መደት እስትዕማር ለትህዩብ ቀራር ሰበት ዐሉ፡ አክል ሕድ አምናሙ ይዐለው ለሰነት። ላኪን ገሌ ዓይላት ፋህማት እብ ስቱር ክሽሮ አዋልደን እንዴ ተርኪሆህ፡ አዋልደን ለአትሃድየ ለዐለየ ወአሸክ እለ እንዴ ኢልትአመረ ለእንሐየ እት ገለት ውብዕድ መናጥቅ ትረከበዩ። አዜ ለአዋጅ ክም ፈግረ ሕነ ምን 1960ታት ለሐደግናህ ክሽሮ “አሰናይ ደአሙ ገብኤ ወሽዑዝ እግልን መሰለ” እት ልብሉ፡ ምን በዲር ለአዝመው ምኑ ክም ቶም እግል መጅተመዕ ፋጅአው። ወእብሊ ገሌሆን እማት፡ “አሰናይ እት ወለትን እዲን ኢከፊኩ፡ አንሳት ዮመቱ ክልኤ ሕርየት ተሐረርኩ” እት ልብሊ ዕላላተን ወቅለ ህለዩ።



ፋጥና እብራሂም

ምን ዮም 18-23 ፈብራይር ለዐለየ አምዳላት ምስል ስኮን ክልኤ ክሽሮ ለአሰረተየ ወብዳሁ ለአወጀየ ምዳርየት አስማጥ ወሀበር ሓለፍናህን። ለሰነት ምን ዲራይ ዓዳት እንዴ አባረው፡ አንሳት እብ አማን ሐቀን ለረክብ ዲብ መርሐለት እቲ ዕዱም ህለው። ለብዕዳም ስኮን ኤረትርየ ህዩ፡ እሉም እግል ልትለው ወዐውቲሆም ዐውቱ ታ'መት ደውለት እግል ትግበኤ እት ልትፋነው፡ እትሊ ሰርገል እግል ልብጽሖ ለረአው ወለሓለፈው መሳድድ ወሳትያሙ ለህለው ሐሊብ ዐውቱ ህዩ እብ ሚ ክም ትረከቡ፡ እቲ ወዴናህ ምስሉም መቃባት ምን ቃሉም ንርከቡ፡ ከቅራኣት በኪተት።

ምን እቲ መናሰበት ለአትሃንናህን አንሳት ወተብዕኹ ምን ስኮን አስማጥ ፋጥን እብራሂም መሐመድ ዐለ፡ “ ምን ምድራት ክሽሮ ሕዳን ደም ሳድፈኹ እት ወክድ ወሊድ መሻክል ሳድፈኹ ጅናህን ለአባዕዕ፡ ደውረት ትትክረዕ ዲቤን ፈሰቱለ ጽብጠኹ ምስክን ገርብ ልትረቤ ዲቤን። ንኢሽ እት እንተ ሰበት ለክክሽህ ህዩ፡ እብ ድንጋጽ ምስክን ሐንገል ገብኤ ዲብ (ልትዐየ)። ቱታንሰ ለሐመ (ሲጋደን ልትዐጽፍ)።

ምን ተዕቢኣት እት ምዳርየት አስማጥ ወዱ ለዐለው፡ አቡነ እድረሰ ጸዕደ ወዐሰማን ሁመድ፡ ክምስልሁመ ጅማዕ ዐሰማን ህለው። እምበልሆመ ኩሎም ከዋድር ምን ሰነት 2005 እንዴ አንበተው ክሽሮ እግል ልሰረት ሰኒ ሸቀው ወተዕቢኣት ወደው ዲቤ።

“አነ ኖሼ ክልኤ ወለት ዋልደት አነ ወእክሽብተን ይኣኩ። ሽዑብ ህዩ እብ ሺድዮ ክሽሮ ወለት ወነሳይቡ ክም ረኡ ጠለቀዩ፡ ሓረቡ ወኪን ቢለዩ።

እማት እሰልፍ ምን መጅተመዕ እግል ልወርኪዮ ቅሩብ ዐለዩ፡ አዜ ላኪን ዝያደትን ወአክልነ ፈሳመሆህ።

አቡነ እድረሰ ድረዕመ ዝክርያቱ እት ጀኣረት ክሽሮ ክእነ ለሓክዩ፡

“ ክሽሮ መጦር ክልኣት ዐንቀር፡ ሼደሊ ወታንሰ ነሓርቡ ምንመ ዐልኩ፡ ቀደም ሕርየት እግል ነኣሰርቱ

ኢቀደርኩ አዜ ላኪን ትርክቱ ሸረብኩ ወእብሊ አንሳት ዮመቱ፡ ጊመት ጨቅዋ እንዴ ትገልጠጡት ምን፡ ክልኤ ዶል ሕሩራር ህለዩ፡ ሕርየት እስትቅላል ምስል ሽዐብን ወሕርየት በይንን ምን ክሽሮ ዮመቱ ረክበዮህ። እብ ሰብ ክሽሮ ጀሬ እተን ለዐለ መታክል ብዙሕ ቱ። ክጠራረት እት ወሊድ፡ መተምታም ሽዑር ወመጸኢት ውብዕድ መታክል”



መሕመድ እድረሰ መሕመድ

ልብል። “ሐሊመ መሐመድ መሕመድ ምን ስኮን አስማጥ፡ “እቲ መደት ሰውረት ትክሳት ወሼደሊ እግል ልትረፍ ተዕቢኣት ገብኤ ዐሉ፡ ሐቆ ሕርየት እት ሰነት 2005 እብ አንበተ ተዕቢኣት እቱ ሰበት ፈሳምናህ፡ እት ሰነት 2007 ለፈግረ አዋጅ ቀደማሁ ሓድጋሙ ዐልኩ። እት ተጃማዕ፡ ዲብ ሺድዮ፡ እብ ደዳናት ወሸሪዐት እኩይ ክም ቱ አመርኩ። ሼክ ዐሰማን እት ተጅማዕ ወጃማዕ ምድረት ክሽሮ ለአሰኣሰ ሰበት ዐሉ፡ እብ ቅሻመት ቱ አሰር ፈርዖን ተላኩ።

ምን ቀምዶትን ረሽይደ መሰል ሰኒት ናይ ምጅተመዕ እግል ትግበኤ ትቀድር፡ ሰበቡ ህዩ ክሽሮ አንሳይት ለኢትኣይድ ቀምየት ሰበት ቱ። ውላድ ተብዕን “አሰናይ ክሽሮ ሰርተ ምንን” ሌጠ ልብሉ - አሊአዩዱ።

ከዲጃ መ/ዐሊ ዐብደሊ ካትብት መሕበር አዋልድ አንሳት እት ምዳርየት አስማጥ ቱ። ህታመ እት ክሽሮ ዝክርያቱ ቤ፡ ምን መደት እስትዕማር እንዴ አንበትን ክሽሮ ክምለ ብዕድ ዓዳት ለድንገር ክም ከረ ትክሳት፡ ሼደሉት ወሃላብ እንዴ ዐለብናህ፡ እግል ልሰረት ብዙሕ ጅህድ ገብኤ ዐሉ፡ ላኪን ቀዋኒን ሰበት ኢፈግረ እሉ ወሸዐብመ ጀህል እብዱይ ሰበት የዐሉ፡ እግል ንትዐወት እቱ ኢቀደርኩ።

እት ሰነት 2005 ላኪን እብ መሕበር ወጠን አዋልድ አንሳት ለትክመ ሰለሰ ምዕል ለክልኣ መሕበር ጎማት ወደየ እግልኩ፡ እትሊ መሕበር ጎማት ሚርሐት ደዳናት፡ አፍረዐት ውብራት፡ ዐባዩ ዐድ እንዴ ሐድረው ዲቤ፡ ክሊን ምስል ቀዋኒን አፍገርኩ እሉ።



ከዲጃ መሐመድ ዐሊ



ከቅኪዎች ቁጠራ በሐር ቀየሕ



እሱ፡ ሪሙ 450 ኪሎሜትር ገብእ። ሪም አጥራፍ በሐር ቀየሕ 600 ኪሎሜትር በጽሕ፡ ምነ ለትሐብን ርዝቅ ጠቢቦት ናይ እሊ አቅሊም፡ ሀለዮት ነዲፍ ወለኢክሰሐ ረዩም ኪሎሜትር ለልትመደድ አጥራፍ በሐር፡ ምስ ዩም አለቡ ናይ መክሉቃት ርዝቁ፡ 254 ጀዛይር፡ 10 ማርሰቃት ወሚናት ለከምክም ቱ። መወቀል ወመድሀር ለመልክ እት ገብእ መወቀል ምለዐል 2000 ምትር ምን ጠፋሐት በሐር ክምሰሁመ መድሀር 86 ምትር ምን ጠፋሐት በሐር በጽሕ። ለትወልቀለት ሓለት ጀው 50 ዲብሪ ሰንትግረይድ፡ ለደሀረት ህዩ 10 ዲግሪ ሰንትግረይት

አቅሊም ቅብለት በሐር ቀየሕ አሳስ ወድ አዳም ወአሳስ ሐዳረት ወተጠውር ምን ገብእ፡ ዩም አለቡ ታሪካይ አካናት፡ ርሹድ ለኢክሰሐ ግንራራብ በሐር እግል ልትዐመር ወልግመል ለቀድፍ ፋዬሕ ወውጡይ ምድር ሐርስ ለመልክቱ። እብሊ አሳስ አቅሊም ቅብለት በሐር ቀየሕ እብ “እም ክሉ ዐቦት” ለልትአመር እት ገብእ፡ እሊ አቅሊም እሊ ታሪኩ እንዴ ተሐፈዘ እት አጅያል እግል ልትዐዴ ወክሉ እግል ለአምሩ ላኪን ጸገም ብዙሕ ልታከዩ ህለ።

አቅሊም ቅብለት በሐር ቀየሕ፡ እብ ሪሙ አወላይ ወእብ ፍይሒሁ ካልኣይ ለልትረተብ አቅሊምቱ። እብ ግብለት ምስል አቅሊም ግብለት በሐር ቀየሕ ወአቶብዩ፡ እብ ምውዳቅ

ጸሓይ ምስል ዐንሰበ እብ ግብለት ምውዳቅ ጸሓይ ምስል ምግብ ወግብለት፡ እብ ቅብለት ምስል ሱዳን ወእብ



ምፍጋር ጸሓይ ህዩ ምስል በሐር ቀየሕ ልትጋነድ።

አቅሊም ቅብለት በሐር ቀየሕ 34,236 ኪሎሜትር መረበዕ ፍይሒ እት ለህሌ

ትበጽሕ።

አቅሊም ቅብለት በሐር ቀየሕ እብ አሳስ እዳርያይ ተክዊኑ እብ 10 ምዴርያት፡ 101 እዳራት ደዋዩሕ፡ 289 ደገጊት ልትከወን። ብዝሓት ቆሚያት ኤረትርዮ ምነ ነብራሁ እት ገብእ ህዩ ምነ ሴዕ ቆምየት ኤረትርዮ ለስስ ቆሚያት እት አቅሊም ቅብለት በሐር ቀየሕ ነበረ። እለን ቆሚያት እለን ህዩ ትግሬ፡ ዐፋር፡ ሳሆ፡ ሕዳረብ፡ ረሻይደ ወትግርኛ ተን። እብ አሳስለ ገብእ ናይ አቅሊም ዕሹር ሽዑብ ህዩ እትሊ አቅሊም እሊ 360.000 ሽዑብ ነብር።



ምን ሐልየት ዐድ-ትማርያም

እለት ገጽ 293- 294 ለህሌት ሕላየት፡ ስልማን ወድ መስመር እግል ከንቴባይ ሓምድ ሹም ሐባብ እት ለሐምድ ለቤለያተ ከለ ሕላየት

መርሐበ ወገያድ ሀረዲት

ክም አብዕቡ ናውድ ሕክሙ ሕፋንቱ ወመሪር

ስቅ ጋድምቱ ሾከት መርግ ለዕዲት

መንክ በልዕ ወግኔ ክም ጽሩይለ ረወሪት።

መርሐበ ወገያድ ህሮደ አሰናይ ደሐን አቴክ ለእት አብዕቡ ናውድ ፍረህ ወፍቱ ተ ወርሕ አድሓቱ መምባዩ ሐዝቤ ሚቡ ወንገ ለአንሰሰ ማሉ ትበጸለ ከለንጸ ገአ ወሴፈ ሸዳድ በትከት እዲነ ርፈዕ ምነ እዲክ እዲነ ኡሁ ትብለ ዐባይ እንዶ ከፊክ እዲነ ህተ ፈግዐተ ከበርደት ዲብለ ሐንቴክ ሕርጊግ ህበይ ወክልብተ ልጸቦረ እዲክ።

ወድ ከንቴባይ ከነትብ ሺመት በዐለ በሐተዩ ወድ በዐል ነጋሪት መንሱራመ ወረአዩ አምዕል ኬደ ወላሊ ለአመት እንዶ ጸብረዩ ልሕጽ እንዶ አሰረ ዐድወ በኑ አተዩ ትወለአ እለ ለአመት ቃልየት እንተ አርከዩ ገበይ ላሊ ምን ትብዴት አምዕል እንዶ ረክበዩ።

እንዶ ዐለ ልደቤ ለባንጆግ ፈግረ ምን ዕዝል ቤት አስገዴ ልትጋመር ሐምስ ምነ ከፈግር ትርክ ቀየሕ ልትጋመር ምን ተሐት ሰብ ለአሰክን ደራቡሽ ልትጋመር ወድ ድግናታት ወሀድር ንጉስ ዐቢ ልትጋመር ሐበሽ መልክ ወመስር እንተ ለትወድዩ አዮ...ተ ወምስትንክር ወድ ከራይ ትጽዕን ወወድ አድግ ትጽዕር እሊ ባትክ ምዕሬት ቱ ወእሊ ባትክ ክጅል ጅር ምን ልቡሉ ሰኒ ወአማን ገርግር ሞቄሕ ወዴ ወሶተል ጀንጀር ወዴ ወሐብል ከራይ እሲት ወደዩ ከእብ ቤት ሀሴት ተአበሽል ሐረምዝ እንሰ ወደዩ ከልጽዕን ምኑ ወለሐሽል ሐየት ገዋድ ወደዩ ከእት ሐንቴሁ ለአክርር

እለን ክም ሐለዩ ከንቴባይ ሓምድ ገመል ወእርበዐ ርያል ወክልኦት ኪስ እክል ሐበዩ



እሊ ደርሰ እሊ ከፊኒ!

እዲነ መድረሰት ታመት ተ፡ ከራሪስ ወመደርሰ ለኢተሐዜ ክም ተ አሰክ እሊ ባጽሑ ለህሌት ፅምር ሸብት እበጽሕ እት ገርብዬ ርኢህ ህሌት፡ እግልሚ ኣነ መራራ እንድኢኩን ዋዕመ እግል ኣትዳውር አሰክ እሊ ባባተ ፍቱሕ እግልዬ ሰበት ይህለ።

እሊ ወብዕድ እብ ፅምር ብዞሕ እትላ እት እነብር ለህሌት እዲነ ምንመ ኢቀደምኩ፡ ምን ሐምቅ ብዞሕ እግል ልሳድፈኒ እት ክም ቀድር ብርህንት እግልዬ ህሌት።

ንኡሽ እት ኣነ ወእለ ኣዜ ለህሌት እት ደረጀት እንዳ ይእበጽሑ፡ ብዞሕ ሳድፈኒ ሰበት ዐለ፡ እግለ እት መስተቅብል ሐያቹ እግል ልሳድፈኒ ለቀድር መጋድእ ወወዛብ እዲነ መቅጠን እንዳ ወዳኑ እግለ እግል ሄርር እት ልቡይ ኣነ።

እግልሚ ክምሰለ ብዕዳም ኣግሩዝ ወኣጃንያም “ኣባይክ ሕልብዬ!” ለትብል ዋዕም ወናይ ወልደይት ክርን ምን ጽባብሓ ሕሰ እንዳ ይእሰምዕ ሰበት ዐቤት እት እሻንህ ወእግል እርከበ እት ሐዜ፡ ኣክለ ብዕዳም እግሎም ሰናቀው እብ ሰፈላለ ውሓዚህ ፅንታቹ ዐናብዑ እት ዘሬ ወሽርብ ወክርንቹ እት ትትሐዘዝ ወትከርብ ሓልፉ ሰበት ኣነ።

በክቹ ሰበት ዐለ ህዬ ለርሐመት ዋልደይት እብ ሐያተ እት ህሌት እሊ ክርን እሊ ምን ቅሩብ ወእት ዎሮ ሸፍር እንዳ ኣምሐበርን እግል እርከበ ቃድር ሰበት ይዐልኩ፡ እብ ሐያት እት ህሌት የቲም ገማም ክም ገኣኩ፡ ሐያት ይትምን እግል ኣትዳውር ቅሱብ ዐልኩ።

እሊ ሐያት እለ ህዬ እግለ መጦርዬ እንዳ ገብኣ ልተልሄ ወደርሰ ለዐለ መልህዬ እግል ኢልኣምረ እንዳ እቤ፡ እት ቀሪኒ ልብዬ እንዳ ደብድብኩወ፡ ክምሰሁ ወዘያዳሁ እግል እግበእ ልባሰዬ እንዳ አንደፍኮ እት መድረሰቹ እግል እፈደብ ህለ እግልዬ ለልብል መብደእ እንዳ ጸበዋኩ፡ እብል እት ኣታፍኣ እንዳ ሐግሐገ ለኣሸሸል እግልዬ ለዐለ ኣቡዬ እት እሰዴ፡ እብላመ ህዬ ለንኣይሽ ሐውዬ እት ኣትመቃርሕ ለሓልፍኩወ ዘበን ሰበት ልትዘከረኒ።

ኣናመ ይሐመቅኮ ረቢ ለጀብሬኒ እት ሐያት ናዩት እንዳ እቤ ሰበት ትከበትኩወ፡ ለእለ መረት ምን መረት ወእለ ትሰደደት ምን ትሰደደት፡ ከህላት ወሰብር እግል ኢዴ እግለ ሰበት ዐለ እግልዬ ከህልኩወ ወኣሰበርኮ እግላ። እለ እት ለህሌት ደረጃት ወኣካን እግል እብጸሕ ህዬ ኣሳሰ ለከሬት እዩ ዐለት።

ኣዜ ኣክል-ሕድ ሳዐት 2.55 ደቂቀት ናይ ላለ ህላ፡ ኣዳም እት ሰክብ ለሀረሴኒ ዝክርያቹ ለክኣት ጋሪት ሰበት ረከብኮ ቱ፡ ላፕቶብዬ እንዳ ኣትዳሌኮ ወመሲቃት ክላሲካል እት እሰምዕ ቱ እሊ ሽዑር እሊ እግል እክተብ ሕሩፋተ እጨቅዋ ለህሌት።

ከም ኢሐለፍኮ መሰለኩም ማሌ፡ ኣሰክ መድረሰቹ እግል እሳፍር ናይ

ነወልዬ እንዳ ሐገልኮ 10 ነቅፊ እረምቅ እቱ ለዐልኮ ወክድ ምስል እለ እት ለህሌት ደቂቀት ኣትቃርኩ እት ህሌት ምድር ወሰማቱ፡ ምናተ እትሌሀ ኢነት ሌሀ ለዐለ እግልዬ ዝሕርታት ሰበት ሰኣንኩወ፡ ዮም ኣክለ ፈቀድኩወ ፅንታቹ ኣናብዑ ዘሬ ህለ። እግልሚ ምስል ዘበን ሰበት ሰኣንኩወ ወለ ወክድ ሰበት ትጀግለባቱ።

ክሉ ትበደለ! ለንኣይሻም ሐውዬ ደሚር በርእ እንዳ ጸብጠው መጦርዬ፡ እት ኣታፊእ እንዳ ትገሰው ኣከለት እት እረውሬ እግሎም ወለ በለሽ ልብል ለዐለ ማይለ ሕለት ክም ውሓይዝ እንዳ ሐሰብኩወ እዳግም እግሎም እት ህሌት ልትረይሖ ወልትበሰጦ እቱ ለዐለው ወክድ። ኣነ ሰላምዬ ወምራጄ እንዳ ሐብዐኮ ለእግል ልትፋግዎ ወልትረይሖ እከልቁ ለዐልኮ ቴለል ዮም እብ ማል ኢልትረኩብ።

ዮም ሌሂታት ወኢረይሐዮም፡ እግልሚ ዝያዳዬ እዲና ፍህማመ

እት ዝክርያት ልትሸመም ምንዩ ሰበት ህለ፡ ለእብ ፅንታቹ ትዘሬ ለህሌት እንብዕዩ እት ኣግያም እንዳ ትበደለት ፅንቱታቹ ጠሺሻይ ወድዮ ምንዩ ህለዩ።

እምበል እሊመ፡ ለእት ኣካን ኣብ ወእም እንዳ ገብኣ ለግቤነ ኣቡዬ፡ ዮም ለዋዑም ፅምሩ እንዳ ነዘዘኩወ ምኑ ኣነ ሻብ ጋብእ እቡ ሰበት ህሌት ወህቱ እንዳ ኣበረ ወትከራከረ ክል ዶል “ኣካን ፍላጎቹ ትወጀግኒ ህሌት” እት ልብሰኒ ዶል ዳግም እግልዬ፡ ለማሌ ሸቅዩ ለዐለ ሸቅል ትሩድ ወለ ዐለት እግሉ ግርመት ወጀላል እግል እርኣዩ እቱ ሐዜ ህሌት። ብዞሕ ሰበት ለኣውደኒ ወምስል ዝሩፍ እዲነ ሐቱ ዋዲ እግሉ ሰበት ይህሌት እግል ኢልጥለመኒ እት እፈርህ።

ይዐሬኮ እቡ፡ እዴሁ እንዳ መልኣት ክም ምራዱ እግል ልጃቅፍ ይኣቅደርኩወ፡ ወእንዴመ ሐመቅኮ መጦሩ እንዳ ኣክረርኮ ዝሩፋ እግል ይኣድሌ እዲነ ኣትራዩመተነ ክምን ቃልሰ ጋሻይ እንዳ ገብኣኮ እጋንሐ



ሰበት ህለው። እምበል እሊታትመ ዝሩፍ እዲነ እንዳ ዐሬት እቦም ገሌሆም ምድር ኣሬመ ገሌሆም ህዩ ዓፍዮት ሰኣነ ወገሌሆመ መስኡልየት እንዳ ኩብደት እቱ እትላ እዲነ እግል ልንበር ኬን ወእንሰር ልትሳሰዔ ሰበት ህላ ቱ።

ሕቅፍዬ ማሌ እብ ሕግላን ቅሩር ምንመ ዐለ፡ ዮም እግል ሓፍኑ ምን እቤ ቀዲር ኣበኩ። እግልሚ፡ ሌሀ ሓለት ሌሀ ሕውትነት፡ ፈተ ወረሐመት ለዐለት እተ፡ እብ መስኡልየት ሐያት ለኢትሸዕር እተ፡ እት ዎሮት ዐርቀይ ሐቱ ሸፈት ባልየት እንዳ ለበሰክ ለትሐፍን እት ሐያት ሕበር ሰበት ዐለት፡ ምን ገርም ወልሓፍን ይህለ።

ዐቢ እግል ምንኣሹ ለልሐሰብ እት ወንኡሽ እግል ምዕባዩ ለፈቱ ወለልሓሽም እት ኢነት። እለ ሰበት ገብኣት ወዮም ሰበት ኢተኣቀብል፡ ኣክለ ሐርፈ እግል እክተብ እዴዩ ኣሰክለ ኮምፒተር ለኣኩወ ገርብዬ

ህሌት።

ኣኪድ ኣነ፡ ደሚሩ ብዞሕ ልብሉ ለህለ። ሸብቱ ምን ተህሌ ብዞሕ ክም ወወደ ወእለ እት ለህለ ዓዛብ ዋልዴን እግል ኢልርኣዩ ምን እለ እዲነ እት ጽባብሐ ውሓዱ ሰንያም እት እንቶም ዳር ኣማኑ ቅዱም ምን ገብእ ወሐረ፡ እግልሚ ለማሌ እት ቀሌ ወልኣሸሸል ዐብዮም ለዐለ ውሓዱ ዮም ክም ዐበው እግል ልርፍዕወ ወልሰፍዱ ልጨባሌ እግሎም ለዐለ፡ ራፍዒቱ ወጎማቱ ሰበት ሐዘው።

ረቢ ጸሩ ለዐቅልል፡ ጸሩ ኢቀለ። ለሐመ እግል ልትጸበዋ ወለ ሐያ እግል ልንሰሕ ወልሐብር ፅምሩ እብ ሆመት ትከለሰ። ዝያድ ማሎም ለናይ ማሌ ራትዕ ፍክሮም ወውፋቅም ትሰፍለለ። ኣክለ ተሃገ፡ “ኣነ ማላት ኢኩን ለሐዜ እሎም ውላጄ ረቢ ዓፍዮት እንዳ ሀበዮም እግልዬ ከፎ እግል ርሐም ገብኡቱ ሀምዩ!” ቢለ። ዝያድ ክሉ ዓፍዮት ዐቅል ደሚር ወገሮብ ሰበት

ትሰፋለለ።

እለን ለምን ቃልሰ እመጽኡተን ኣምዴላት ዮም ለኣክጅላኒ ህለዩ፡ እግልሚ እግሉ ዶል እረክብ እት ገርቡ ለእቀርኡ ከሊማት ሰበት ህለ ወእት ደሚሩ ለህለ ሽዑር ሰበት እሸዕር እቡ ቱ።

እሊ ክሉ እግል እገላብብ እንዳ እቤ ታመት ኣምዕል ምስሉ እት እትሃጃክ ወሰግመ ምስሉ እት እገደሰ ከላሰ እግል ኣትሳሕቁ እጀርባ፡ እለመ ፈጅር እግል ተህሌ እግልዬ ሰበት ኢኩን።

እትሊ ኣያም ቅሩም ላኪን በዲር እብ ወለት ገበይ ወእብ ኣሻይር ልብለኒተ ለዐለ ዘዐት እብ ዋድሕ ደጋግመ እግልዬ ህለ፡ “ህዴ” ለትብል ዘዐት።

ክሉ ልትሓበር እቹ ህለ፡ እብ ፍንቱይ “ሰምግኒ ሕልብዬ፡ ኣነ እንተ ዶል ተህዴ እግልዬ ኣነ ክም ሐጀጅኩቱ!” እንዳ ቢል ዶል ልትሃገኒ ለእት ደሚሩ ለህለ ሓዜ እግል ኣትምም ገለድ እንዳ በኣኮ እሉ እግል ኣትምም ላሊ ወኣምዕል

ሐሬኩ፡ እብል ገበይ ለሄረርኩም ወክድ፡ ዮም እቹ ኣኪ ህለ።

እግልሚ ፋርሕ ወልወቅ እት ኣነ እት ብሶቶም ወኣብራኩም እግል እሰዐምም እት ሐዜ ዘበን ህለ እግልዬ እት እብል ምን እዴዩ ለመልጪ ዘበን ወለትፈንቱኩወ ዋልደይቹ ትዕሰ ዋድየት እቹ ሰበት ህሌት ቱ።

ማሌ እግል እለውቀ ወምስለ እተልሄ ሐዜ ለዐልኮ እምዬ፡ ግራህ ክም ሀበተኒ ትፈሀማኒ፡ እት ደሚርዬ ትደርር ለዐለት ረሐመት እብ ፅንቤዕ ክም ተሓወልኩወ እለ እሰትራትጅየት እለ ክም ኢትነፍዕ ኣመርኩ።

ከላሰ እዴዩ ሀብኩ፡ ለቀደም እለ ገብኣት ትክፊኒ እቤ፡ እትላ እዲነ እብ ሕበር ለህሌናሁ ወክድ ምስል ዋልዳዬ እግል እትሃጃክ ወእትሰሐቅ ሐሬኩ፡ እግልሚ “ትዕሰ ማሌ ልክፊኒ” ሰበት እቤ።

ምናተ እለ ሓሰደት ዘዐት እብ ትሉሉይ ዳግመ እግልዬ ሰበት ህለ፡ ለድግምን እት ውሰዋሰ ገብእ ሰበት ህሌት ሰኒ ወኣማን እሰርት እቹ ህሌት። ምራጄ ብዞሕ ሰበት ዐለ ወሄራር ሐያቹ ልሰዕ ሐቱ ምስዳር ናሰእ ምኑ ሰበት ይህሌት፡ ለህግያሁ እንዳ ፈቀድኮ ነፍሼ እት እንዳ ትወለብኮ ለእት ማጽእ ለህለ ተቅዩር እገንሕ ወእግል ህዳይ ታምም ውሓልፍ ክምህሌኮ ኣክድ ምነ።

እሊ በሰ ዋጅብቱ ምን እብልመ ብዞሕ መሐለኪት ክም ህለ ሰበት ልትርኡኒ፡ እሊ መሐለኪቹ እሊ እግል እፋትሕ ኬን ወእንሰር እብል ህሌት። ዝሩፍ እዲነ ናይ ኣማን መልህይ ውብዕድ እት ወግም ኣትዩ።

ክትር ለእግለ ህሌት ወለ ናይ ዋልደዬ ድቁጣት በዝሓ እቹ፡ ምነ ሐሰበ ለዐልኮ ፍክረት እት ገሌ ንቃዋ ተቅዩር ዋዲ ህሌት። እግልዬ ትመስል ለእብል፡ እብል ሐያት እለ ለሐልፈት ምን እረክብ፡ ለገብእ ህዳይ ፋሻት ወክእነ ኣነ ለህሌት እት ደረጀት ሸቅል ለወድወ ዐዘማት ወፈረሕ እንዳ ኣወለጥኮ ምኑ፡ ሰለሰ ነፌራይ ለበ መናሰበት እንዳ ወዴኮ እግል ኣትምሙ ወይኣቤት።

መድሐር እሊ ፅምሩ እግልነ ለሓለፈዩ ኣቡዬ እግል እርከብ እንዳ እቤቱ። ዮም ለማሌ እትሐለመ ለዐልኮ ሐያት ኢኩን ለህሌት። ሕልምዬ ከፎ ፍጃን ማይ እንዳ ትካፈለት ምስልዬ እለ እዲነ ለትጋብህ መልህይ እረክብቱ ቱ። ነሰበ እት ወግም እንዳ ይኣቱ ገበይ ረቢህ እንዳ ጸብጠት እበ ቅድረተ ተሐይሰ ተሐምቅ ለትብል ምስልዬ ወእለ እብ ሰባቹ ሰኩብ ባዲ ምኑ ለህለ ኣቡዬ እብ ሸቅለ ወረሐመተ ክም ኣቡህ እንዳ ርኡቱ ወህቱ ክም ወለቱ እንዳ ኣምነ እበ ምራዱ ለተኣተምም ኣንሳይት ሐዜ ህሌት።

ልተላሌ.....
ምን ግቡእ ግብኣም
08/12/2015
ኣሰመረ

መርገም ፈርዑናት

ለጋራው ሊተባበሩት ከሆኑ እንዲሁ ትጀረክ ረብሽት ለወደ ዲብኔ ሞት እብ ክልኦት ደንበረ እግል ትሐርዱ ቱ” እሊ ለዐል ክቱብ ለሀላ ዝያታት፡ ዓልም አሳር ላቱ (ሃዎርድ ካርተር) ምስል መለሀዩ (ካርናፎን) ናይ ሰስ ሰነት ተዐብ ወጅርሰት እንዲሁ ሓልፈው እተለ እሙር ቀብር ናይ ፈርዑን (ቱት ዓንጃን አሙን) ለረክበው እቱ ወቅት’ በህለት ሰነት 1922፡ እተ ቀብር ክቱብ እት እንቱ ጸንሐዮም። ከእለ ዘዐት ወላ እግል አቅብር ፈርዑናት ለተምተመ እምበል ሞት ብዕድ ዕቃብ አለቡ ለለብል ተህዲድ ወአትፋርሆት፡ ምን ዑለማላ አሳር ዎርትመ ለትሐሰረ ዲቡ ይዐለ። በህለት ዲብ እሊ ወቅት እሊ ናይ እሎም አሰናም ለዐብዶ ለዐለው ቀደም 4000 ለዐለው ፈርዑናት ሀገጊት እቡ ለለአምን ሰበት ይህለ። ወእምበል እሊመ ዝያድ ሕሰር ለለአተውዱ ጋር አመርት ናይ እሊ መቅበረት ሰበት ዐለ፡ ወናይ ለወቅት ለሀይ ለዐበ ጋር ሰበት ዐላ ቱ።

ወምን ቅያስ ወለዐል ለለአትፈክር ወአስክ እሊ ወቅት ዑለመ ተፍሲር እግል ልርከቦ እሎ ለኢቀድረው ትረኣ። እተ ምዕል ለእብ ገበይ ረስምየት መድሐራት ናይለ መቅበረት ገብእታተ። ሎርድ (ካርናፎል) ሓመ። ለገርቡ እሳት (ሕመት) ልዓት እቱ ወሰር ላሊ እባሁ ሞተ። ወምን ክሉ ለለአትፈክር ህዬ ዲብ መዲነት አልቃህረ ሰበቡ ለኢተአመረ እተ ዶል (ለካርናፎል) ሞታተ ከህረበት እት ክለ ለመዲነት ቀስነት። ወሐቆ እሊ መሳይብ አሰር ሕድ እት ልትከፍከፍ እንዲሁ አንበተ፡ ሞት እግል ክሉም እትለ መቅበረት ለመጸው ምን ኢልትበሃልመ አዳም ቅያስ አለቡ ሻተፈት። ወዲብለ መቅበረት ክቱብ እት እንቱ ለጸንሐ ታህዲድ አማን ገብኣ።

እት ልርእዩ ክባባይ ገብኣ። ወ ለ (ብላሃርስ) ለልትበህል ተብዕን ብልሃርስዩ ለአመረ ዓልም፡ ዲብ አል አቅሰር ለሀላ አሳር ፈርዑናት ክም ዐፈ እሊመ ሞት ሽትፈቱ። ከእለ መርገም ፈርዑናት ለአድመዐቶም ቅያስ ሰበት አለቦም፡ እሎም ቶም ወዐደድ እሊ ገብኣ እግል ልትበህልመ ሰዱድ ገብኣ። ወለበዝሐው ምኖም ህዬ ዑለመ ወሰብ ገጽ ላቶም አንፋር ዐለው፡ ወእሊመ ብዙሕ ክም ትትፈክር ወዲከ።



መዕሉመት

- ምርት ወድ አደሚ ሰለስ ዶል አሰር ሕድ ምራቁ እግል ልውሐጥ ኢቀድር፡
- + ለሰልፋይት ወለካልአይት ዶል እግል ልውደየን ቀድር፡
- ምናተ ለሳልሰይት ዶል ላተ እግል ልውሐጥ ለልትቀድር ኢኮን።

ዝበድ ዝያታት

- እዲነ ክልኤ ምዕል ተ። ለሐቱ ምዕል እግልክ ወለሐቱ እትካ
- + ከእግልክ ገብኣት ምን ገብኣ ኢትትፈገዕ እሊ።
- ወእትክ ገበኣት ምን ገብኣ ሰብር ውዱ፡ ህተንዲ ክልኢተን ግራህን እግል ለሀባካ ተ።

ልባብ

ሐሰት ምክራዩ እምር ኢኮን

አርበዐት ደረሰ ጃምዐት፡ ገለ ምስምስ እንዲሁ ወደው ምን እምትሓን እግል ልትረፎ አተፈቀው። ከእበ እስታዞም እንዲሁ አተሰለው ክምእነ ቤለዉ።

ዎርት ጎመ ናይለ ዐርብዮቶም ክም ትፈርገዐ፡ ወእት እኩይ ተየልል ክም ህለው፡ ወወቅትለ እምትሓናት ለለዐሩ እበ ዐርብዮት ክም አለቡ ጎርም፡ ወምድር ሰኔ ረዩም ጋይሳም ክም ህለው ደግመው እሉ።

ለእስታዞም ህዬ ለእምትሓናት እግል ለአጅሉ እሎም አተፈቀው፡ ወህቶም ጠብዐን ሰበት ተዐውተው እብሊ ምን ቅያስ ወለዐል ፈርሐው ወዐለ ኬፎም እትለ ሀይቦ ወነሶኦ አስመነው፡ ወምን እምዕለ እምትሓናት ተርፈው። እተ ምዕል ለእለ ሕዱድ እሎም ዐለ፡ ለኡስታዝ እብ በይኖም እምትሓን አዳላ እሎም። ለኡስታዝ ህቶም እግል ኢልቅሸሽ ወኢለሐሱ እግለ አርበዐ ደረሳይ ዎርቶም ተ ከረዩም ምን መልሂቱ እት ዎርት ርክን እብ በይኑ ክም ልትገሌ ወደዮም። ወውራግለ እምትሓናት ሀበዮም።

ለአስእለት ለእለ ሀበዮም ሚ ትመስል ዐለት ትመስለኩም? ምስለ እሉ ደርሰው ድሩሳት ለተአተፍቅታ ገብኣ መሚ እግል ትግበኣ ቱ?

ለአስእለት ክም እሊ ተሌ

ዐለት፡

1 - ከፈርላ ዐርብዮት ለትፈርገዐ እትኩም አዩ ምኖም ቱ?

2 - ለተየልል ለሀይ ለሐሰለ እቱ ወቅት ሳዐት ከም ዐለ?

3- እተ ወቅት ለሀይ ለዐርብዮት ሰውግ ምንኩም ለዐለ ምን ምንኩም ቱ?

4 - እተ ከራሲለ ዐርብዮት ለሳልፋይ ምን ምንኩም ግሱይ ዐለ?

5 - ለታርፋም ህለው መልሂትክ አክል ሕድ ክም እሊ ናይክ በሊስ እግል ለሀቦ አክል አዩ ዳምን እንተ?

ወእት ደንጎሳ “ክልኩም በሊስ ራቴዕ ሀብኩም ምን ገብኣ፡ እግል ክል ምንኩም ደረጀት ካምለት እግል ትትሀየበኩም ቱ። ወለፍገሪት ዐክሰ እሊ ገብኣት ምን ገብኣ ህዬ፡ እንቱም ሓሳዮም እንቱም፡ ወእምበል ተሪፍ ሐቱመ ትታኬኩም ይህሉት” እት ልብል ከትብ እሎም።

ክል ዶል ምን ሳድፈክ ተየልል እግል ትህረብ ወትትሓበዕ ኢትዋጥን። ምን ለአምር እሊ ሱዱፍክ ለሀላ ተየል እግል ኢትትባጠር እት ትብል የም አለቡ እግል ተሐሴ እግል ትጀርብ ቱ። ሐሰት ህዬ መንፈዐት አለበ ወእት ባጥል ለትበነ ክል ዶል ባጥል ገብኣ።

እሲት ግርም ወዕምር ጥዉል “ክልኤ ሰንያት?! ሰገን ወወላተመ ኢረክበያህ”

ሐቱ ሰኔ ለተአትፈክር ድራሰት ክመ ሸርሐቱ እናስ እሲት ግርም ሀደ ምን ገብኣ ዕምሩ ሐጨር ቱ ትብል። ዲብ ጃምዐት ፈለንሰዩ ለሸቁ ባሕሲን ክመ ሀድገው፡ ዎርት እናስ ምስል እሲት ግርም እብ በይኖም እግል መደት ሐምስ ደገገት ጸንሐው ምን ገብኣ፡ “ለእናስ ኮርቶዶል” ለልትበህል ሆርሞን ሰጥጥ ምን። እሊ ሆርሞን እሊ ህዬ ሰከር ወውቁል ጨቅጥ ደም ወሕማም ልብ እግል ልምጽኦ ምስምስ ለገብኣ ሆርሞን ቱ።

ብዕደት ድራሰትመ እብ እሊ ለከሰስ ክም እሊ እት ትብል ወሰከት፡ ለድራሰት ውላድ እንግሊዝ ላቶም ባሕሲን ወደው። ከእሊ ብሐሱ እሊ ለሐበረዩ ነቲጀት፡ ለአንስ ለምን 14 አስክ 14 ናይ ግርመት መቃዩስ ለበን፡ ምስለ እሎም ተሀደዩ ኡብኣሰን እግል መደት ሓጫር እንዲሁ ነብረዩ ከመንበለዩ። ወአንስ ሕድት ግርመት ለብዲበን ለሀደው ሰብ ተብዕን ህዬ እግል መደት ረያም ፍንጌ 20 – 30% ለትገብኣ ነብረው።

ዲብ አሰባንዩ ለገብኣት ድራሰት ህዬ፡ 3500 እናስ እግል አንስ ገራይም ለሀደው ትከምክም ዐለት። ክምን አግደ ነታይጅ ናይ እሊ ድራሰት እሊ፡ 80% ምን እሎም ሰብ እሎም፡ እብ ሰበብ ግርመት አንሶም የም አለቡ መሻክል ዋጅሆዮም፡ ወእብ ሰበቡ እት ብዙሕ ናይ ነፍሲያት መሻክል ትከረው። ወእብሊ ምስምስ እሊ፡ እብ ብዙሕ ናይ እሊ ዘመን ሕማማት ክም ሰከሪ ወውቁል ጨቅጥ ደም ክም ትጸበጠው ተአመረ።

ተበሰም

ዎርት አፋህ

ገውትይ እት ቅደምለ ሹም እንዲሁ በጥራ ምን አመረ ለሹም ገሌ ህያብ ምን ለሀይላኔ እንዲሁ በለ ሰእዩት ሰበት ወደ ተማም ሐለዩ። ምናተ ለሹም ሐብቲትመ ይህዩ። ወእንዲሁ ለአተንሰዩ ዐለ፡ ዶል ለሕላዩ አክለሳተ፡ ለአፋካ ህዬ ሚ ክኣነ ነውኔቱ? እት ልብል ትሰኣለዩ። ለሐልያይ ህዬ፡ ሰኔ ሓርቅ ወንኩድ ዲብ እንቱ “ኣነ እግለ ኢለኣሰታህሉ ሕላይ ግሩም ሰበት ሐሌት ቀደብ ረቢ እት እንቱ እድመሐይ ህለ” በልዩ ልትበህል።

10 ፍንቲት ሕዜ





(8ይ ክፋል)

ሰሚረ፡ እ’በ አ’መቱ ለኢ.ዐለት እለ መትፈንታይ ፈታዩ ምንመ ሐዝነት፡ እብ እንክር ብዕድ ላኪን ፈርሐት እግሉ። እግልሚ፡ ዑመር እግል ረድኢት ወጠን ወሞት ወቅታል ጀላብ ሽዑብ ወሕሽመት ሰያደት ወጠን መትበጋሱ፡ ል’በ እንዴ ለአነድድ ትሰክብ ወወትፈዜዕ እቡ ለዐለት አፍካር አቡህ ኢብደ ምነ። ምን ሐረስ እለ፡ “በደል እምበል ዘንብ ወጀሪመት እብ እዴ አቡዬ ዋልዳዬ ልትቀ’ተል ላተ፡ ሞት እት ወጠን ተሐይሱ። ወየምክን እግሉ ሌጠ እንዴ ኢገብእ፡ ረቢ ለዓለሚን እግልዬ ወእግሉ፡ ለምንጌል አለቡ ሻምነ እግል ንቅጸር ወክብድ ዋልደይቱ እግል ትብረድ እብ ሐያቱ ወሰላሙ ተርፍመ ኢኮን፤ ያረቢ እ’በ ቅድረትከ፡ ዐምቤጣይ ምን ከሌዕ ፋሌሕ ፋግር ውደዩ” እንዴ ትብል ዲብ ረቢህ አተድዔት። ለሐሜር ርሳለት ፈታዩ ዑመር ክም ቀርአት ህዩ፡ “ዑመር እንተ እለ ሐቆ ወዴከ አናመ ነወይቱ ዲብ ገለድ አማነትከ እግል ሐዋዋ! በሰ ረቢ እብ ሰላምከ ልብለሰከ ዲብዬ ሸፋዬ” እንዴ ትቤ፡ ቀለ ክም ኢትበድል ወዐድ አቴት።

ለከረ ዑመር ጽዕነት ለዐለት መንኪነት ማርቼድሴ፡ ቀደምለ ብዕዳት ጸርታተ፡ ለርሐብ ጋድሞታት በርክ እንዴ ወሔት ክማም ዲብ መዐስከር ተድራብ ሳወ ገበአት። ለቀደም ከረ ዑመር ለዐለው አንፋር ደውረት ክድመት ወጠን፡ እተ መትሐድራይ ሸባባት ወመውርሳይ ታሪክ ፍርስነት ወሐጠር ላቱ መዐስከር ክም አተው፡ “መርሐበ ብኩም ወአሰናይ ደሐን መጸኩም፡ አቤኩም ኢልጽነሐኩም እምበለ ፈቱኩም!” እንዴ ቤለዎም እብ ማይ ወነብረ ሐቀለ ትከበቶዎም፡ እግል ለዓርፎ አብያት አርሐው እግሎም። ለልትሐጽብ ሐቆ ተሐጸበ ወለለዓርፍ ራሐቱ ክም ነሰኦ፡ ምስል ሐዎም ወሰናቶም ልትሃጀኮ አምሰው። ለቀደሚሆም ድርብት ለዐለት ደውረት ህዩ፡ እግል ተዋል’ለ መዐስከር ወተድራብ ሐቱ-እብ ሐቱ ሓከው እግሎም። እተ መደት ለህ ሳወ፡ ክምስል እሊ ናይ ዮም ተዐሊም አካዳሚ

ሰ’መዕ ክልኢት ክበር

ኬትባይ=ዐሊ አቢብ እድሪስ

ወድራሰት ምህነት ለልትህዩብ ዲበ እንዴ ኢትገብእ፡ ናይ ትድራብ ዐስከሪ ሌጠ ሰበት ዐለት፡ ፈጅራተ ሓሪት፡ ለከፊ ተድራብ ዐስከሪ ለአትመመው፡ ለራፍዓመ ለዐለው መስኡልየት እግል ከረ ዑመር እንዴ ሰለመው፡ አስክለ ገለብ መዳፈዐት ሕሽመት ወጠን ወሽዑብ ጋብእ ለዐለ ሰዋትር ሐርብ ትሳርሐው። ከረ ዑመር ህዩ፡ ለቀደሞም ለዐለው አንፋር ደውረት ክድመት ወጠን ለአርፈዐዎምተ አማነት እንዴ ሐጠጠው፡ እግል ተድራብ ዐስከሪ ትዳለው ከአሌፍ ቤለው።

ሐቆ ናይ ሰለስ ወሬሕ ተድራብ ዐስከሪ ህዩ፡ ክምስለ ጀርደት ዲብ መብረድ ሐጺን ለትሰሐሉ፡ እብ ወጠንየት ዛይደት ወረፊዕ አማነት ሹውህደእ ሸባባት ለልትሰሐሎ ዲቡ መዐስከር ሳወ፡ አስክለ ፍራስ መሔርበት ሻፋም ዲቡ ለዐለው ሰዋትር ሐበን ትወዘዐው። ዑመር ምስል ሐዉ ወሰናቱ፡ ጀብህት ቡሬ በጽሐቱ። ለሄራር ሰፈር እብ ምድር ወእብ በሐር ለተሐባበረ ዲቡ ሰበት ዐለ፡ ከህላት ተዐበት፡ ትርሃን፡ ጽምእ፡ ሰፍረ፡ ወዲማቱ ለኢትነጽፍ ኤማን ሳብት ለለሐዜ ዐለ። ሐቆ ሄራር አርበዕ አምዕል ህዩ፡ እተ ቀደሚሆም ለዐለው ፍራስ መሔርበት ተሐበረው።

ዲበ ወቅት ለህይ ምነ ለዐለዩ፡ ጀብህት መረብ ሴቲት፡ ጀብህት መረብ ዐሊቲ፡ ጀብህት ዛል-አንበሰ ወጀብህት ቡሬ፡ እብ ሪመ፡ እብ ሐፋነት ጸሓይ ወጽምእ፡ እ’በ እግል ሐርብ ለኢትወጠ መካሪት ምድር ግምጩይ፡ ብሶትከ ለተአትሔጌ ዲቡ ሰዋትር አድብር ወዐነክል ሰበት ኢዐለ ዲበ ሌጠ እንዴ ኢትገብእ፡ እብ አህመየት እስትራተጅየት ዐስከርየት፡ ለትደቀበት ጀብህት ሐርብ ለዐለት፡ ጀብህት ቡሬተ። እግልሚ፡ እብ ሪም ምድር ረድኢት ሻፍገት ለኢትረክብ ዲቤ፡ ሐፋነት ጸሓይ ሰገ ሞራይ ለትአበሸል፡ ግራክ በሐር፡ ቀደሚከ አዳም ለሰንዐየ ለኢትምሕክ እሳት ሐጺን፡ ምግሳይከ ላሊ ወአምዕል

ለኢትበርድ ተነት ብርካን፡ ሸማልከ ገጽ ለትሰውሴ ወልብ ለትቃምድ ካቤት ጸሓይ፡ ምክያድ እግርክ ጅረድ እበን ሱጡር ወዕርፍ ለአለቡ ዔደር መዳፊዕ ወረሻሻት እብ ምድር ወእብ ሰመ ሰበት ዐለ፡ ምለዐል ክሉ፡ ዲብ ጀብህት ቡሬ ሻፋም ለዐለው ቅዋት ድፈዕ ኤረትርዩ፡ ክምስለ እት ለብተ እሳት ለተአመክኩ ደህብ እንዴ ትላደው፡ ሰላም፡ ሕሽመት ሰያደት ወዐማር ወጠን እግል ለአክዶ፡ ገዲሞም ወሐዲሶም አክል ሕድ፡ እብ ፍርስነት ወሐጠር ልትሰየፎ ወምስትንክራት ታሪክ ወዳ ዐለው።

ንዛም ወያኔ፡ ለህይከ አሰር ለህይ ለአትበገሰዩ ሰለስ ወራራት፡ ክሎም በልቀት ዐላል ኤማን ወሰባተት ፍራስ ቅዋት ድፋዕ ኤረትርዩ ወሸዕቡ ሸልተፈቶም። ለሕልም ወራር ወዘማቱ፡ ሰአየት እንዴ አጽበረ ክም ሞፈአት እንቅዕራር ዲብ ነሐር መትበግሰቱ አቅበለ። ዑመር ምነ ልክየ ወጠን እንዴ ሰምዐ ዋጅቡ እግል ለአትምም ለትበገሰ ዲቡ ወቅት ወሐር፡ ምን ሸንከት ዐ’ዱ ወፈታይቱ ለረክበዩ ከበር ኢዐለ እግሉ። ዐዱመ እተ ክምሰሌሁ፡ ዋልደይቱ ከብደ እብ ሀ’ማት እንዴ ተአግህጽ እብ ሚትፈግር ዲብከ እንዴ ትትበጭበጭ፡ ከበሩ ወረኢሱ ትጠየን ምነ። ዑመር ዲብ ጀብህት ዐሰብ እግ’ለ ዌራይ ዴሽ ኦቶብየ እንዴ ለዐጭድ ወቀርድድ፡ ሰቡል መሔርባይ ገብአ። ምነ ሐርብ ህዩ፡ ደዐ ፈታይቱ ሰሚረ ረቢ ቅቡል እንዴ ሀበዩ፡ ምን እስትሸሃድ ወምስክነ እብ ሰላሙ ተርፈ። ሰልሴቱ ለወራራት ሸመት ውጽዔ እንዴ ትገልበበ ምንመ አክተመ፡ ለግድለ ቅዋት ድፈዕ ኢአትካረመ። ዑመርመ ክም አዳሙ፡ ዲብ ዐማር ወጠን ትበገሰ።

እትሊ ወቅት እሊ ክም አተድሐኑ፡ ዲብ ዐ’ዱ ጀዋብ ህሌኮ ምንመ ለአከ፡ ህቶም ውህቱ ገጽ-እብ ገጽ ርኡያም ኢዐለው። ምናተ እብ ከበር ሀለዮቱ ሌጠ፡ ገሌ ምን ጸር ሸቀላቶም ቀ’ለ እግሎም።

እብ ፍንቱይ ዋልዳይቱ፡ “አልሐምዱልላሂ ረቢ ለዓለሚን፡ ሐምዴ ወሸክር ትብጸሐክ ሞላዬ!” እንዴ ትብል ህምድ ትቤ።

ሰሚራመ እብ እንክረ፡ ዑመር ዲብ ክድመት ወጠን ሐቆ ጌሰ፡ ጭምብው፡ ሰርቤብ፡ ሀጋይን ወሰፈላል እንዴ ልተራተው ዲበ ለኢጠሉመ ገላጊል አማነ ገብአው። ል’በ እብ እሳት ሻማት እንዴ ነ’ደ ፈሐሙ አትቃሰነ። ህግያህ ምስል አዳም ሐደት። ብልዐ ወሲቶህ ዲብ ምዕል፡ ክም ሓግለት ሐቱ አለበ አሮት ውካን ሌጠ ገብአ። አክ’ለ እግል ትብለዕ ወትሰቱ ትቤከ፡ ዑመር ቅብላተ ልትዐ’ገል ዐለ። ለዓጭሞታተ ላብስ ለዐለ ሰገ ቅነጻት ሸ’በት፡ ክም ገርህት ቀይም እክለ ሕስሐስ ተሀሻሀሽ ከትከማጀነት። ለከመዶረት ብሸል መሰል ለዐለ ሕብር ገርባመ፡ ዲብ መደርፈይ ትሸበህ። ምስል አዳም ለዐለ እግል ዕላቃትመ እንዴ ልውሕድ ጌሰ። አዳም ለልብላተ ህግዩ ሐቆ ካልእ ወሳልስ ዶል ትፍህመ። ምናተ ቀበ ሰሚረ ለለአምር ዐለ አለቡ። እብ ፍንቱይ ዲበ አምዕለ በገሱ እተ ለሐድገዩ እግል ርሳለት ለትፋነያበ ፊነ፡ ክል ዶል ትፈቅ’ደ ወትደጋግ’መ።


እብ ሰሚረ እብ ሓለት ወለቱ ሹቁል ምንመ ኢዐለ፡ እም ሰሚረ ላተ ምን ሸቀላት ወለተ ትትሻቀል ሰበት ዐለት፡ “እለ ወለት ኢነጌት፡ ጅን ከደን ካምተ ሀ’ለ እንድኢኮን ምን ብላዕ ወሲቶ ወኢሴመት። ለእግል ትሰአልነ ምን ትሰአልናህ በሊሰ አዚም ወሚ ገብአኮ እቤለኩም ሌጠ ገብአ። ሰሚረ ከደን እ’መ ሓሰድ ሌጠ ትጃበበተ። ሕብረ ትጨባለ፡ ሰጋህ ገዕዝ ከሰቅመት ወአርወሐተ ለክፈት” እንዴ ትብል ምን መሻይክ ዲብ ሕከመ አንጎጌት እ’በ። ሰሚረ ላኪን እምበል ሰፈላል ዑመር ቀበ ብዕድ ኢዐለ እግሉ። ምናተ ሻም እግል ኖሱ ዕድር ሰበት ገብአ፡ ናይ ኖሱ መሳርያይ፡ መክይራይ፡ ሴርዳይ ወቄርኣይ ወረቀት ፍገሪት ፍሕሱ ለሐዜ። ላኪን “ውላድከ ዋልድ አታልዩ ወቀባከ ጃርብ

አሳርዩ” ክምሰለ ትትበህል መሰል፡ ዋልደይተ ቀበት ሳክባም ተርህ እ’በ ምንመ ዐለት፡ ምን ጀህት አቡህ ላተ፡ እምበል “ድቦ ትርኢ ለበቀል እ’ለ፡ ሕድት ብዝሕት ሚገብኡት፤” ምብላስ ብዕደት ሰበት ኢዐለት እግሉ፡ ቀበ ሰሚረ ለልፍህም ኢዐለ።

ምሴት ሐቱ፡ አብ ሰሚረ ምን ሸቅል ክምሰል ዔረ፡ እም ሰሚረ ለናይ ለካ’ላት ጀበነተ ምን ቡን እንዴ ለግመተ እግል ወእግል ብእሰ ለለአሰቱ ማይ እብ ሸረቅረቅ ሐቆለ ቀየሰት ዲበ በጭበጩተ ወሐሬ፡ ለምግብለ እተ አፊት ለፋግረት ገጽ-ገጽ ልብል ለዐለ፡ እግል ቅምዳት ሸዌት ዕፋን ቀይም ለትተምነዩ ገሀር ዕጩይ ዐቅበ እበ ተንን ለዐለ እያድ እንዴ ጋልህቱ፡ ምትካይ እንዴ ተአትጣፌሕ እግል ተኬተ ወሐሬ፡ እግል ሰላት አመቅረብ ትወዴት ወትሰሌት።

በርህት ጽልመት እግል ተዓር’ፈ ምድር ዕውድወድ እንዴ እንቱ፡ ሰለስ ነፈር ዲበ ፍድግ እንዴ በዋረው “ሰላም ወዐለይኩም ሰብ ዐድ!” ቤለውከ አስክ “ዐለይኩም ወእሰላም ቀደም በሎ አርሕቦ” ለልብል በሊሰ ልትህዩም በዋረው። አብ-ሰሚረ ምነ ሐቆ ሰላት አመቅረብ እብ ምንክቡ ጋብእ ዲበ ለዐለ ሰ’ጋደት ከዕሌ ሕልዊት ጸላም እብ ምግሳዩ እንዴ ገብአ፡ “መርሐበ ዐለይኩም ወእሰላም!” ቤለ ከምን ወምን ክምስልቶም እግል ልፈርገም ሰኒ እንዴ ፈዋነ ገንሐዮም። ምናተ ፈርጌሆም ወቅት ረዩም ሰበት ኢሐዜት ምነ፡ ክም አመረዮም እንዴ እንቱ፡ “ቀደም በሎ እብለ አርሕቦ አባይኩም ኢልጽነሐኩም እምበለ ፈቱኩም ትፈደሎ!” እት ልብል አትራሐበ እግሎም። እም ሰሚራመ፡ እት ረአሰለ እግል ወእግል ብእሰ ታክየተ ለዐለት ቡን እግል ትወስክ እንዴ ትቤ፡ ለጀበነት ከፊተ፡ ከእተ ኮስኮስ ዊደት ቡን ሐዳስ እንዴ ከፊት ቀሌተ ወወገአተከ፡ እት ረአሰለ ቡነ ለቀዳሚት ዲበ ጀበነት እንዴ ሴመተ፡ አጊድ እግል ትፍለሕ እንዴ ትቤቱ ገብአ፡ እ’በ ዲብ እዱማነ ለዐለት መሸረፈት እንዴ ትሸር’ፈ፡ ሌል ወፈዋን ከልአተ።----

-ትተላሌ



ጋሮኑ፡ ዱር አሚሳ-ቦንጎ

ማሌ ለሀ ቀዳሚት ለትክሰት 12ይ ብድረ ዐጀላት ዱር አሚሳ-ቦንጎ፡ ዕዱ ፈሪቅ ወጠኒ ኤረትርዩ ኤልያስ አፍወርቂ ፋርስ ሰጋደት ገአ።

ለ150 ኪሎ ምትር ለትገልብብ መርሐለት፡ እብ ዐውቱ ወድ እስባንዩ ኒኬል አሪስቲ ትተምም እት ህሌት፡ ኤልያስ አፍወርቂ ህዬ እተ ገአ ናይ ሰጋደት ብድረ 1ይ እንዴ ፈግረ፡ እት ዕምር ንእሹ ዐውቱ ሰጀለ።

እትሊ ምን 27 ፎብራዩር አስክ 5 ማርስ ለልአተላሌ 12ይ ዱር አሚሳ-ቦንጎ፡ መትባድረት እት 7 መርሐለት ሐድ አልፍ ኬሎ ምትር ለገልብብ ብድረ እግል ሊደውቱ።

ፈሪቅ ኤረትርዩ መትባድረት ሚሮን አብርሃም፡ ዓወት ሃብቶም፡ ዘመንፈስ ሰለሙን፡ ኤልያስ አፈወርቂ፡ ሳይሞን ሙሴ ወዮናታን ሃይሉ ለሐቅፋቱ።

12ይ ዱር አሚሳ-ቦንጎ እት ካልአይት መርሐለቱ 98 ኪሎ ምትር እግል ልገልብብ ቱ።

እሊ ክእነ እት ህለ፡ እት ዱር ላንካ ሻርክ ለህለ ነፈር ናዲ ግብለት አፍሪቀ ዳይመንሽን-ዳታ ላቱ መክሰብ ደበሳይ፡ እት ዓም ናይ ወቅት ብድረ፡ ደረጃቱ ምን 5ይ እት 4ይ ውቁለ ህለ።

ዱር አቡዘቢ ተምመ

ማሌ ለሀ ቀዳሚት ለተመ አርበሪ መራሕል ለክምከመ ጅግረ ዐጀላት አቡዘቢ እብ ዐውቱ ወድ ፖርቱጋል ሩይ ኮስተ እብ ኪሉል ወክድ ተምመ።

እሊ እግል ሳልሳይ ወክዱ ለገብአ ጅግረ ዐጀላት ናይ ምርልድ ቱር ደረጃት ለቡ እት ገብአ፡ ፈሪቅ ዳይመንሽን ዳታ እግል መትባድረቱ ዳንኤል ተክሌሃይማኖት፡ መርሃዊ ቅዱሴ ሻዝሊል፡ ያን ሻንማርክ ካሸንዲሽ፡ በርናርድ ኢልሰል፡ ማርክ ሬንሻው ኢጎር አንቶን እሹሩክ ዐለ።

እተ ጅግረ ለሐሰት መቅደረት

ክም ቡ ለአርአ መርሃዊ ቅዱስ ህዬ ምን ዕውትሉ ጅግረ እብ 2 ደቂቀት ወ38 ካልኢት እንዴ ተአከረ 43ይት ደረጃት ጸብጠ።

እተ ጅግረ መትጃግራይ ኩክ ስቲፕ ፍሎርስኩልያን ሕሩይ መተልህያይ ሻብ እንዴ ትበህለ አወላይ ፈግር እት ህለ፡ መርሃዊ ህዬ እብ ደቂቀት ወ45 ካልኢት እንዴ ደንገረ ምኑ 9ይት ደረጃት ረክበ። ወድ ብሪግንዩ ምን ፈሪቅ ዳይመንሽን ዳታ ላቱ ማርክ ካሸንዲሽ 53 ንቅጠት እንዴ ጀምሮ ዕውት ፍሌንዶት አክደር ገብአ።ፈሪቁ ህዬ ምን 20 ፈረቅ 18ይ ፈግረ።



ኤረትርዩ እት ማራቶን ያባን

ማሌ ለሃ ቀዳሚት እት ያባን ለገብአ ጅግረ መራቶን ቶክዮ ኤረትርያይ አትሌት ዮውሃንስ ገብረገርጊሽ ሳብዓይት ደረጃት ክም ጸብጠ ሸበክት ሐብሬ ያፍ ሐበረት።

እሊ እድንያይ ጅግረ አትሌቲክስ እብ ደረጃት መሕበር አትሌቲክስ ዐለም ናይ ደህብ ደረጃት ለቡ ጅግረ እቱ አትሌት ዮውሃንስ እግለ ጅግረ እብ 2 ሳዐት 8 ደቂቀት ወ14 ካልኢት

እንዴ አትመመዩ ቱ፡ እለ ደረጃት እለ ለረክበ።

እትሊ ጅግረ እሊ ወድ ኬንዩ አትሌት ዊልሰን ኪፕሳንግ እብ 2 ሳዐት 3 ደቂቀት ወ58 ካልኢት ልትዐወት እቱ እት ህለ፡ ውላድ ዐዱ ኪፕ ኬተር፡ ቼምባ፡ ቼበት ወለጋት አስክ ሱሳይ ለህለ ደረጃት ጸብጠው።


እብ ሸማላት ለተለ ጅግረ እቱ ለትዐወት አትሌት ዊልሰን

ኪፕሳንግ ለሰጀለዩ ወክድ ለሐሰ ናይ መራቶን ወክድ እት ያባን ልትሰጀል እብ ህለዮቱ፡ ብዕደት ፍንቲት ለጅግረ ጋብእ ህለ።

እት ጅግረ እሊ እት ጅግረ አዋልድ አንሳት ወለት ኬንዩ አትሌት ሳራ ቼፕቺቪር ተ አወለይት ለፈግረት።

ህተ ጅግራህ እብ 2 ሳዐት 19 ደቂቀት ወ47 ካልኢት እንዴ አትመመቱ ሐዲስ ሰጅል ካትበት ህሌት።

ፕሪመርሊግ እንግሊዝ ቀበ ፈሪቅ ሌስተር ተአመረ



ደዓም እት ጅግራታት ፕሪመርሊግ እንግሊዝ ሰነት እብ ግዲደ ልሽሕግ ለዐለ ፈሪቅ ሌስተር ሲቲ፡ ትልህዩ ፕሪመርሊግ እንግሊዝ እግል ልትመም ሐድ ወክድ ወጅግረ ክም ተርፈዩ፡ ፈሪቅ ሌስተር ሲቲ ዐባዩ ፍረቅ እት ፈልል ሰበት አወልወለ ፈተሽ ርያደት ዐለም ሐዳስ ሓድሰት ሰበት ረአው አስክ ካስ ነስእ ለኢልትአመን ሐዋድስ እት ልቡሉ ካስ ፕሪመርሊግ እንግሊዝ እግል ልንሰእ መጥሩ ባጥራም ዐለው።

እብሊ ህዬ ፍንቱይ ታሪክ እት ጅግራታት ፕሪመርሊግ እንግሊዝ እግል ልሰጀል ቀድረ።

እሊ እት ሐንቱ መደርብለ ፈሪቅ ለዐለ ፊኒኒ ለትረከበ ዐውቱታት እት ሰነት ሐዳስ እግል ልትደገም አውመ ህዬ እት አጥራፍ ዐውቱ እግል ልጽነሕ መቅደርት ቡ ለትበህለ ፈሪቅ ሌስተር ሲቲ፡ ምን ሰልፉ ገበይ ጸዕደ ኢኬደ።

እብ ቅልብ ትልህዩ አምዐሞክ ቤል፡ እብሊ ገበይ እለ ህዬ ዶልክ እት ልትፈለል ሰበት መጸ መቅደረቱ ምን አምዕል እት አምዕል እት ተሐውን ጌሰት። መሰጅዒኑ ደንገጸው ወክምሰለ ፍንቱይ ታሪክ ለሸቀ አዜመ ፍንቱይ ወጸለም ታሪክ ገጽ ሐር እቱ አሳደረ፡ መሐልሊን ርያደት ሐለለ ወአትፈከረ።

እት ክሉ ጅግራታት ፈለል ወመጦር ፈለል አክረረ አስክ እለ ጋብእ ለህለ ጅግራታ እቱ ዝያድ 27 ጅግራለ ፕሪመርሊግ ንቃጡ እት 20ታት ተግ ወደ።

ክሉ ሀሙ ወሀም መናጀራትለ ፈሪቅ እት ካልአይ ዲቪዥን እግል ኢልትከሬ ሌጦ ገብአ፡ እግልሚ ምን እለ ደረጃት እለ እብ ሐቱ ንቅጠት እንዴ ትወቀለ እብ 21 ንቅጠት ያለጢፍ ልብል ሰበት ዐላቱ።

መናጀራትለ ፈሪቅ ሐቆ ጎማት ብዝሕት መደርብለ ፈሪቅ እትሊ አያም ቅሩብ ምን ፈሪቅ ክም ልትሳረሕ ወሐዲስ መደርብ ክም መጽእ ወደው። እለ ምስዳር እለ እግለ ለሐሰ መደርብ እንዴ ትበህለ ጃእዘት እትሊ አያም ቅሩብ ለነስእ መደርብ አድረቦት ብዝሓም መደርቢን ወመሐልሊን ርያደት ኢትከበተዉ፡ ምናተ ለምስዳር ሰበት ትነስአት ፊኒኒ ምን ፈሪቅ ትሳርሐ።




ፈሪቅ ሌስተር ለሐልፈተነ አትኒን ናይ ሰልፍ ጅግረ እት ሐንቱ ሐዲስ መደርቡ ምስል ፈሪቅ ሊቨርፑል ትልህዩ እምትሓን ልትጸበሩ ዐለ፡ ህቱመ ይሐምቀ እት እምትሓን እበ ተአትዐጅብ ገበይ 3 እብ 1 እንዴ ቀልበ ተዐደዩ።

ፈሪቅ ሌስተር ሲቲ እት 28 ደቂቀት እብ ሕሩይ መተልህያይለ ፈሪቅ ሸርዲ ጎል አተ። እሊ ጎል እሊ ህዬ እግል ፈሪቅ ሌስተር ሲቲ ሐለት ሰበት ሀበዩ ትልህዩ እት ሐንቱ መራቀበት ለፈሪቅ እግል ትእቱ ቀድረት፡ ግራሁ እት 38 ደቂቀት ፈሪቅ ሌስተር ጎል ሰበት አተ ዕርፍ 2 እብ በሕ ፈግረው።

ግረ ዕርፍ ለገብአት ትልህዩ ዶል እንርኤ ህዬ እት 60 ደቂቀት ለትልህዩ ሸርዲ ሳልሳይ ጎል እግል ለአቱ ሰበት ቀድረ እት ሐንቱ እሊ ሐዲስ መደርብ ፈሪቅ ሌስተር ሲቲ ቀባሁ ተአመረ።

ፈሪቅ ሊቨርፑል እት 68 ደቂቀትለ ትልህዩ እብ ኮቲዮ ጽምእ ጎል ለትበልስ ኩረት እት ሸግዲት ሌስተር ወሸቀ፡ ግረ እሊ ጎል እሊ ለትረከ ተቅዩር ሰበት ይዐለ፡ ትልህዩ እብ ዐውቱ ሌስተር ሲቲ 3 እብ 1 ተመት።

ለምህመት ለንቃጥ እንዴ ኢገብእ እለ ትልህዩ እለ ቀበ ሌስተር ሲቲ እግል ተአምር ለትሰዴ ሰበት ዐለት ቀባለ ፈሪቅ ለቃልዐት ሰበት ተ ዝያድ እህትማም ቡ።



ሸዑብ ወዓዳቱ

ለለአትዐጅብ እምነት (ዲን) ህንዱዊዝም



ብህን ቤት ዕባደት “ካርኒማታ”፡ ምን ብዕድ እት ህንድ ለህለ ኡብደት ዕባደት ብዘሕ ፍንቲት አለቡ። ዝያዱ ላኪን ገርም ወልትሐሬ። ምናተ ሴክነት ወፍንቲት መራዐየት ለትገብእ እግሎም ናይ እሊ ብካ ዝያድ 20 አልፍ ለገብእ ዐንጺት ቲ።

እሊ እት ደሸነክ አቅሊም ራጂሲታን ለትትረኩብ ቤት ዕባደት፡ ቀደም 500 ሰነት ለትብኔት ገብእ እት ህሌት፡ ለዲብ ሸቂት ህሌት አካን ላኪን እት መአንበት 20 ክፈል ዘበን እብ አሮት ኔሽራይ አው ኤምናይ ሂንዱዊዝም ላቲ ምህራጃ ትውርት ክምተ ልትአመር።

እትለ ቤት-ዕባደት ለነብር ዐንጺት ምን ለዐል ክሉ እት ዐለም ለህለ ዐንጺት እት ራሐት ነብር ወለዘት ሐያት እብ እሕትራም ለአዳውር። እት ቀበት እሊ እብ ግርመቱ አልባብ ሲያሕዩን ለሰልብ መብካ ግሩም ለትፈናተ እግለ ዐንጺት ለረይሕ አግባብ ሀሊ። እተክምሰልሁመ አምዕልክ እብ ኤምነት ለልዳሌ ነብረ ወሐሊብ ሀሊ። ለዐንጺት ህይ ምን እሊ ነብራሁ ወሐሊብ እት ልትአወክ ልውዕል ወልትመዩ። እምበል እሊመ ለግአባቡ ወእብ

ዓመት ለቤትለ ዕባደት ለለአንድፎ አንፋር ሀለው። እሊ ዐንጺት እሊ ህይ፡ አጀኒቶም ለሸፍዐው ምኖም ኤምነት ምን ለትፈናተ ባዓት ወአከድን እንዴ ተአረውቱ ለእት እሊ ቤት- ዕባደት ለመጽእው።

እትለ አካን ዕባደቶም ህይ እት ምን ነሐስ ለትሸቀ ሸሓናት በሌዕ ወሰቱ፡ በርኩት ናይለ ዐንጺት እግል



ልትሓወሎ ለለሐዙ ኤምነት ህይ ምስለ ዐንጺት እት ልትሓወሎ በልዮ ወሰቱ በህለትቲ።

እሊ ዐንጺት ላኪን እግልሚቱ አክል እሊ ሕሸመት ለልትህዩብ? ለሐካኪቶ እሊ ለተሌተ።

“ካርኒማታ” ለትትበህል ክም ረቢ ሂንዱዊዝም ለትትሐሰብ፡ እግል ርሕ አሮት ለሞተ ጅነ እግል ትብለስ ክም ጀረበት፡ “ያመ” ለልትበህል መለክ አልሞት እንዴ በድረየ እግለ ርሕ ናየ ጅነ እት ብዕድ አዳም በደለየ። እብሊ ሸቅል እሊ ለሐርቀት ካርኒማታ “ሐቆ ዮም ክሎም ለማይታም አጀኒት፡ ቀደም ካልእ ዶል እት ብዕድ አዳም እንዴ ትቀየረው ልትከለቁ፡ እት ዐንጺት እግል ልትቀየሮ ሀለ እግሎም” ትቤ። ምን እሊ ሓካኪቶ እንዴ ትበገሰውቲ ኤምነት ህንዱዊዝም እግል እሊ እት ቤት-ዕባደት ለሀሊ፡ “አልካምባ” ዐንጺት ነኣይሽ ለልትበህል ዐንጺት፡ ምን እት ከደን ለሀሊ ዐንጺት እብ ፍንቲይ ለልትረኤ።

እት ምግብ እሊ ዐንጺት ሐዳም ጸዕደ ሕብር ለሞም ዐንጺት ሀለው፡ ለበዝሐው ቤጽሐት እሊ ቤት-ዕባደት



ህይ ክም ፋል ሰኔት ሰበት ለሐሰብም እቶም ልብ ከሩ። ለዐንጺት ለጸዓዲ ክምሰለ ብዕዳም መልሂቶም ምስለ ኤምነት ኢልተልሀው ወምን አዴሆም ኢልተለመሾ።

ናይ ሰድፈት ቱ ገብእ?

• እሊ እት መጦር ሰራት መሰት አዘል ለሀለ ነፈር አቡሁ አው ሐሁ ኢኮን። ኢንዞ ፈራራ መአንብታይ መአሰሰት መካይን ፈራር ወሰሙይ መትባደራይ እብ መኪነት ዐሊ።

ህቱ እት ዕምር ንእሹ ሻም ትልህዮ ከራት ምንመ ዐለ እግሉ፡ እብ ለሳይፈዩ ደረር እግሩ ላኪን እት ብድራ መካይን እግል ልትሓበር ወብዘሕ ዐውቲታት እግል ልሰጅል ቀድረ። እት 1988 ህይ ሞተ። አክል- ሕድ እት ሰነት ለሰሙይ መተልህያይ ከራት እግር መሰት አዘል ትወለደ እተ። እት ናይ ክልኢቶም መትማሳል ልብ ለከረው አፍራድ፡ አዘል እግለ ናይ ኢንዞ ለዐለት ጽምእ



ትልህዮ ከራት እግር እግል ለአርዋ መጽኤ እት ልብሎ ልሰምዮ ሀለው።

• ርኢስ ምስር ለዐሊ፡ ጀማል ዓብደልናስር፡ እት 1918 ትወለደ። ምን 1952 አሰክ 1970 ህይ እግል18 ሰነት እት መሳኡልየት ጸንሐ። እት መሳኡልየት እት 1952 መጽአ ወእት 52 ሰነቱ ሞተ።

• ርኢስ ሶርየ ሓፍዝ አልአሰድ፡ እት1930 ትወለደ። ምን 1970 አሰክ 2000 እግል 30 ሰነት እት መሳኡልየት ጸንሐ። እት መሳኡልየት 1970 ዐርገ ወእት 70 ሰነቱ ሞተ።

• ሰዳም ሐሴን፡ እት ሰነት 1937 ትወለደ። እግል 37 ሰነት በህለት ምን 1979 አሰክ 2006 እት መሳኡልየት ጸንሐ። እት መሳኡልየት እት 1979 ዐርገ ወዲብ 79 ሰነቱ ሞተ።

• ርኢስ ሊብዩ ለዐለ መብመር ቀዛፊ፡ እት 1942 ትወለደ። እግል 42 ሰነት ሐክመ። እት መሳኡልየት እት 1969 ዐርገ ወዲብ 69 ሰነቱ ህይ ሞተ።

ቅሰት ሱረት



እት ቀቢለት ማሳይ፡ “ምን ዝያድ በልዕ” ለልትበህል ናይ ፍርሰነት ብድረ ሀሊ። እሊ እትለ ሱረት እንርእዩ ለህሌነ ነፈር፡ ሓጥር ናይለ ቀቢለት እንዴ ትበህለ ለትሐራ ቲ። ህቱ ሐቲ ፍሊት እንዴ በልዐ15 ሊትር ምን ሐሊብ ሳቲ ሀለ!!

ለኢትፈትሐ መሳእል

• እት ውላየት ፍሎሪደ አሜሪካ፡ አንፋር ፖሊስ ኤፍ ቢ ኣይ(FBI)፡ ሜሪ ሪዘር ለትትበህል እሊት-ዐባይ እት ቀበት ከሺነት እንዴ ነደት ጸንሐቶም። ክሉ እት ከሺነት ለዐለ ዐፍሸመ እንዴ መካ ጸንሐቶም።



አሰክ እሊ ለትበህለ ልሙድ እግል ልግበእ ቀድሮ። እግልሚ እብ ሀመሌ ብዝሓም አብዮቶም ወርሐም ለለሐግሎ ርእየት መቢዒ ሰበትቲ። ለኢልሙድ ናይ እሊ ነድ ላኪን፡ እግል እሊ እሊት ለአንደደት እሳት ቅያስ ሐፋነት 1500 ዲግሪ ሴንትግሪይድ እብ ዐለዮቲ።

እሊ ደረጀት ሐፋነት እሊ ህይ ምን ልሙድ መሻቀዩ እሳት እግል ልትከለቅ ኢቀድር፡ ምን እት ሸሪነት እብ ፍንቲይ ለዳለ እግል አምክሶት ሐጺን ውብዕድ ትሩድ ሓጃት ለልትነፍዮ እብ ለትሰረረተ። ምንለዐል ክሉ ለለአትዐጅብ ህይ ለደረጀት ሐፋነት ለእግል ሜሪ ሪዘር ለሓሸሸት ምን ርሐ ለትከለቀት ምን ገብአት ቲ።

እሊ ሓድስ እሊ ህይ እብ ኖስክ ነዲድ “self-ignition” ለልትአመርቲ። መሰአለቱ ህይ አሰክ አዜ ምስጢር ጋብአት ህሊት። ብዕድ ለለአትዐጅብ እንክር ናይ እሊ ሐፋነት እሊ፡ እግል ፋይሕ ድዋር እግል ተአንድድ ቅድረት ምንማብ፡ እምበል ገሮብ ናይለ ነፈር ለምኑ ትከለቅ ወእት ባዩቲ ለጸንሕ ዐፍሽ ብዕድ ለኢተአንድድ ምን ገብአት ቲ።

• እት1930መ፡ ማብል አንድሮዝ ለትትበህል መሰሰዓይት፡ እት ሐቲ አካን ሰሰዒት እት ሰሰዕ፡ እት ቀደም ዔፍየተ እት ቀበት ሰዋኒ ጨበል መአሻት ትቀየረት።

• ሚቸል ካርፕንተር ለትትበህል ብዕደት ቀኒመትመ እት 1938 እት ከዞን ኖርፎልክ ምስል ብእስ ወአጀኒተ እት ህሊት፡ ሰድፈት ነደት ወሞተት።

እት ሕልም ለብናቱ ረአይ እት ሕልም ለብናቱ ረአይ ምን ነፈር እት ነፈር ልትፈናቲ። ኢሻ ሂልስትሮን ለትትበህል ወለት ሰዊድን፡

ሐቲ ምን እብ ሕልምም ለልትሐሰር ወእግለ እት ሕልምም ለልርእወ ሐዋድስ ለወሰቅ ቲ።

ሐቲ ላሊ እት 1954 ፡ ኢሻ እት ሕልሙ፡ አሮት አክደር ለሕብሩ ባቡር፡ ምን ገበዩ እንዴ ፈልተ ምስል መኪነት አክደር እት ልዳገሽ ትሐለመት። ህተ ምን ሕልሙ ድንግጽት እት እንተ ምንመ ሐሶሴት፡ እተ ህተ ውብእስ ነብሮ ዲብ ለዐለው መዲነት ሰቶክሆልም ለዐለ በዋቢር ሰውቲት እብ ዐለዮቲ ብዘሕ ኢትሐሰረት እቲ። ምናተ ለሓድስ ለጀረ ዲብ አካን እብ ሐት-ሐቲ እት ሰጅለ እንዴ ሰጅለቲ። ፈጅራተ እግል ብእስ ክም ህጅክ ዓድየት፡ “ምን መዲነት ዲጎርሆልም ለትበገሰ ባቡር አክደር፡ ምስል ሐቲ እት ሻርዕ አርበዕ ለተዐሸገት መኪነት አክደር እግል ልዳገሸቱ” ቤለቲ። ለእት ሰሓፊት ሸቂ ለዐለ ብእስ እተ ለአዳልዩ ለዐለ ዓሙድ አጣጣሚቶ “እሲቼ ለተሐለመቱ ሕልም” እብ ልብል አርእስ እግል ቂርአት አሰአለዩ።

ምስል ሪም ወቅት፡ ኢሻ እግል ሕልሙ ትረሰወቲ። ሐቆ ክልኤ ሰነት ላኪን፡ እት1956 ጀራይድ ሰዊድን፡ “ምን መዲነት ዲጎርሆልም ለትበገሰ ባቡር፡ ምስል ሐቲ እት ሻርዕ አርበዕ ዕሸግት ለዐለት መኪነት አክደር ዳገሽ” ለልብል ለለአትሐዘን ከበር ነሸረዩ።

ቀደም እሊ ሓድስ እሊ፡ ቀደም ሰለስ ወርሕ፡ ሕኩመት ሰዊድን እግለ ኩለን ሕብር ሶታይ ለዐለ እግለን በዋቢር፡ ሕብር አክደር እግል ልቀይሮ እትን እዝዝት ዐለት።

ክእነመ ሀለ

ሎረንስ ጆን ለልትበህል ወድ70 ሰነት ላቲ አምሪካይ፡ እት ወረቀት ጸዕደ፡ ምስልዬ መንዱቅ ሀሊ፡ እት ቦርስትቼ 5000 ዶላር አክብ!!” ለልብል ክቲብ እንዴ ተብጠ፡ አሰክ “ብራዘርሁድ ኤንድ ትራሰት” ለሰሜቱ ባንክ እንዴ ጌሎ እግል መትክብታይ ግሩሽ ሀበዩ። ለነፈር ለወረቀት ክም ቀርኤ፡ ምስሉ ለጸንሐ 3000 ዶላር ሀበዩ።

ጆንሶን ላኪን በደል ለሀርብ፡ እት መጸበሪ ዘባይን ለዐለ ሳሎን እንዴ ትገሰ እግል አንፋር ፖሊስ ትጸበረ። አሰክ እት አካን መጽኦ ለዐለው ፖሊስ እንዴ ቅርብ፡ “ለእሉ ተሐዙ ህሊኩም ነፈር አናቱ” እት ልብል ሰለመ እቶም። ሐቆ እሊ ሽግሩሽ እት ባንክተ ተአቀብል እት ህሌት ሎረንስ ላኪን አሰክ ሐብስ ትጌለሊ። ህቱ ሕት ቀደም ዳገዩ ክእነ እት ልብል ቃሉ ሀቡ፡ “አነ በደል ምስለ ክልዶል ፍንጌር ወበአስ ለትትገረር እሲቼ ሰጅን ለሐይሰኒ ሰበት እቤቱ ለክእነ ወዴኩ፡ ሰበት እሊ እብ ትትቀደረኩም ዐይብኩም እግል ጀይም ሰፍታት ፍረዱኒ” ቤለ።

እብ ደሚን እግል ልፍገር ሕቀለ ተአጀዘ እግሉ፡ እሲቱ ሕንዴ ደፍዐት እግል ትደመኑ ሞንመ ሐዜት ህቱ ላኪን “ሰጅን ሕሐይሰኒ” ሰበት ቤሉ፡ አሰክ ቀራር ሕትህዩቡ አሰክ ሰጅን መዲነት ሕሸንምርስ አተጅሀ።

